

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI RABU : 9 DISEMBER 2020

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 44)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 9 DISEMBER 2020 (RABU)

SOALAN

PUAN RUSNAH BINTI ALUAI [TANGGA BATU] minta **MENTERI KESIHATAN** menyatakan apakah jangka masa yang ditetapkan bagi rakyat untuk mendapat perkhidmatan yang lebih efisien dari Hospital Besar Melaka terutamanya merujuk kepada sistem pendaftaran dan rekod pesakit yang masih dikendalikan secara manual.

JAWAPAN

Tuan Yang di-Pertua,

1. Kementerian Kesihatan Malaysia akan terus komited dalam memberikan perkhidmatan kesihatan yang lebih efisien kepada rakyat Malaysia termasuk di Negeri Melaka. Langkah-langkah untuk meningkatkan efisiensi dilaksanakan secara berfasa dan mengikut keutamaan. Antara langkah-langkah yang diambil oleh KKM untuk memberikan perkhidmatan yang lebih efisien adalah:

- i. Pertama, pelaksanaan **Hospital Kluster** sejak 2014. Melalui Hospital Kluster, hospital daerah dan penduduk sekitarnya akan mendapat khidmat kepakaran secara terus dan berkala melalui perkhidmatan kepakaran yang disepadukan dan dikordinasikan dengan lebih bersistematik. Dengan inisiatif ini kesesakan diwad dapat dikurangkan; Hospital di Melaka yang terlibat dengan Hospital Kluster Melaka adalah Hospital Melaka (Lead Hospital)

di mana perkhidmatan kepakaran diberikan kepada Hospital Alor Gajah (Non Lead Hospital) dan Hospital Jasin (Non Lead Hospital). Perkhidmatan Hospital Kluster bukan sahaja dilaksanakan di Melaka tetapi di seluruh Malaysia.

- ii. Kedua melalui pendekatan ***staggered clinic appointment (temujanji berfasa)*** pesakit hadir pada masa yang telah ditetapkan. Dengan cara ini kesesakan di klinik dapat dikurangkan kerana pesakit datang pada waktu yang ditetapkan sahaja. Pendekatan ini bukan sahaja dilaksanakan di Hospital Melaka, tetapi di fasiliti-fasiliti kesihatan lain di Kementerian Kesihatan Malaysia
- iii. Ketiga, mengaplikasikan ***Lean Healthcare*** dalam proses rawatan pesakit di Zon Hijau Jabatan Kecemasan, dan juga proses kemasukan serta discaj pesakit di wad. Proses kemasukan dan discaj akan menjadi lebih efisien termasuk pengurusan katil yang lebih efektif bagi mengurangkan kesesakan di wad selain memendekkan tempoh menunggu katil bagi pesakit yang memerlukan rawatan pesakit dalam. Inisiatif ini dilaksanakan di 52 hospital KKM termasuk Hospital Melaka akan dilaksanakan di hospital-hospital lain. Contoh inisiatif dalam ***Lean Healthcare*** adalah;
 - a. Penubuhan ***Bed Management Unit (BMU)*** untuk kemasukan pesakit elektif (iaitu pesakit yang telah diberikan temujanji untuk kemasukan ke wad) serta memastikan pesakit-pesakit yang memerlukan katil dapat diutamakan dengan cepat; dan
 - b. Projek rintis ***Multi-Disciplinary Short Stay Unit*** adalah sebuah unit yang disediakan bagi merawat pesakit dari pelbagai disiplin yang dijangka hanya memerlukan rawatan tidak lebih dari 72 jam tanpa perlu kemasukan di wad. Contoh pesakit-pesakit yang dirawat di unit adalah seperti pesakit yang memerlukan rawatan dehidrasi dan pesakit yang memerlukan pemantauan klinikal sehingga berada

pada tahap kesihatan optimum. Projek rintis ini sedang dijalankan di beberapa hospital di Lembah Klang.

iv. Inisiatif-Inisiatif Lain Untuk Meningkatkan Efisiensi Perkhidmatan Farmasi dan Tambah Nilai Farmasi (Value Added Service, VAS) untuk memudahkan pesakit mendapatkan bekalan ubat susulan dan mengurangkan masa menunggu di hospital-hospital dan klinik-klinik kerajaan:

- a. Sistem pembekalan ubat-ubatan (SPUB)
- b. Perkhidmatan Ubat Melalui Pos (UMP)
- c. Farmasi Pandu Lalu
- d. Perkhidmatan Locker4U
- e. Perkhidmatan Sistem Temujanji secara telefon dan SMS

Perkhidmatan Nilai Tambah Farmasi ini adalah antara faktor yang telah menyumbang kepada pengurangan masa menunggu pesakit di Kaunter Farmasi Hospital Melaka.

Tuan Yang di-Pertua,

2. Kementerian Kesihatan Malaysia (KKM) telah menetapkan supaya skop pelaksanaan EMR diperluaskan kepada semua fasiliti kesihatan Kerajaan (hospital serta klinik kesihatan) di seluruh negara secara berfasa termasuk Hospital Melaka. Untuk Fasa 1, sebanyak RM140 juta telah diluluskan untuk projek EMR yang akan dilaksanakan di fasiliti kesihatan KKM di Negeri Sembilan meliputi 7 buah hospital, 44 buah klinik kesihatan dan 12 buah klinik pergigian. Projek ini akan dijangka akan dilaksanakan bermula tahun hadapan.

3. Di seluruh negara, setakat ini 19 Hospital mempunyai Hospital Information System (HIS), 6 Hospital mempunyai Sistem Pengurusan Pesakit (SPP) dan 10 Hospital mempunyai Sistem Pengurusan Pesakit Dalam (SPPD).

4. Buat masa ini sistem pendaftaran di Hospital Melaka di buat secara manual. Sistem ini **akan dinaiktaraf kepada sistem IT. Kerja-kerja naik taraf persedian kepada sistem IT di Hospital Melaka sedang berjalan dan dijangka siap pada tahun 2022.**

5. Pencarian Rekod Perubatan Pesakit secara manual bagi temujanji di klinik pakar disediakan dalam tempoh 3 hari sebelum tarikh temujanji dan telah **mencapai 98.29% bagi tahun 2019 iaitu melebihi 95% standard** yang telah ditetapkan. Kaedah ini bukan sahaja dilaksanakan di Hospital Melaka tetapi di kebanyakan Hospital di Malaysia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 9 DISEMBER 2020 (RABU)

SOALAN

DATUK HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI ALAM SEKITAR DAN AIR** menyatakan langkah yang diambil oleh pihak Kementerian untuk memastikan tiada masalah catuan air akibat pembocoran paip yang berulang kali di Sabah.

JAWAPAN

Tuan Yang Di-Pertua,

1. Kejadian paip bocor merupakan isu yang lazim menyumbang kepada gangguan bekalan air di kebanyakan negeri. Memandangkan tanggungjawab perkhidmatan bekalan air adalah di bawah kerajaan negeri, Kementerian Alam Sekitar dan Air (KASA) mengesyorkan supaya Jabatan Air Negeri Sabah (JANS) merancang secara strategik dalam menangani isu kebocoran paip yang berulang secara cekap dan efektif. Isu operasi dan penyelenggaraan sistem bekalan air perlu diberi perhatian dan diselesaikan oleh JANS.
2. Misalnya, Projek Pembinaan Loji Air dan Pemasangan Rangkaian Paip di Daerah Beaufort, Sabah yang dimulakan pembinaan pada 8 Mei 2013 dengan kos projek sebanyak RM226 juta telah pun siap sepenuhnya pada 22 Ogos 2017. Namun begitu, masalah bekalan air masih tidak dapat diatasi sepenuhnya kerana beberapa isu operasi dan penyelenggaraan seperti kadar kebocoran paip (NRW) yang terlalu tinggi di daerah Beaufort sehingga mencecah 60% telah menyebabkan bekalan air tidak sampai ke pengguna.

Sekian. Terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 9 DISEMBER 2020 (RABU)

SOALAN

Minta **MENTERI PENGANGKUTAN** menyatakan langkah-langkah yang akan diambil oleh Kementerian untuk menjaga hak dan kepentingan rakyat akibat pertukaran jadual penerbangan, kombinasi penerbangan dan pembatalan penerbangan yang sering dimaklumkan pada saat terakhir terutama MAS yang enggan memberi bayaran balik penuh kepada para pelanggan yang terbabit.

JAWAPAN

Yang Dipertua,

1. Untuk makluman Yang Berhormat, Kod Perlindungan Pengguna Penerbangan Malaysia 2016 (*Malaysian Aviation Consumer Protection Code 2016*, MACPC) telah diperkenalkan dan dikuatkuasakan oleh MAVCOM mulai 1 Julai 2016 yang bertujuan untuk melindungi hak dan kepentingan pengguna dengan memastikan semua aduan terhadap syarikat-syarikat penerbangan diambil tindakan dan diselesaikan.
2. MACPC 2016 telah dirangka dengan tujuan untuk melindungi hak dan kepentingan pengguna selaras dengan *Convention for the Unification of Certain Rules for International Carriage by Air* yang biasanya dikenali sebagai *Montreal Convention 1999* dan *ICAO Core Principles on Consumer Protection*.
3. Bagi tujuan menangani hak dan kepentingan rakyat berhubung pertukaran jadual penerbangan, kombinasi penerbangan dan pembatalan penerbangan, MACPC 2016 mempunyai peruntukan khusus untuk menangani isu ini.
4. Kelewatan dan pembatalan penerbangan atas sebab teknikal atau kapasiti penumpang yang tidak memuaskan akan membolehkan penumpang ditawarkan pampasan, penjagaan dan pembayaran ganti.
5. Manakala, sekiranya **pengguna sendiri yang membatalkan penerbangan**, maka bayaran balik tiket kepada pengguna adalah tertakluk kepada terma dan syarat yang telah dipersetujui oleh kedua-dua pihak iaitu syarikat penerbangan dan pengguna, semasa pengguna membeli tiket tersebut.
6. Sehingga akhir September 2020, pihak MAS telah membayar balik sepenuhnya harga tiket bagi 222,594 penumpang dengan bayaran sebanyak RM378,649,134.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI JALALUDDIN BIN HAJI ALIAS
[JELEBU]**

TARIKH : 9 DISEMBER 2020 (RABU)

SOALAN

DATO' HAJI JALALUDDIN BIN HAJI ALIAS [JELEBU] minta **MENTERI KESIHATAN** menyatakan berapa jumlah sukarelawan yang dilantik secara kontrak untuk membantu Kementerian Kesihatan Malaysia untuk dalam mendepani pandemik COVID-19 ketika ini, dan adakah mereka ini mempunyai peluang diserap masuk sebagai kakitangan tetap.

JAWAPAN

Tuan Yang di-Pertua,

1. Sehingga 30 November 2020, Kerajaan telah meluluskan pelantikan secara kontrak seramai 4,739 petugas kesihatan dengan kos sebanyak RM163.8 juta yang ditampung menggunakan peruntukan Pakej Rangsangan Ekonomi PRIHATIN serta Kumpulan Wang COVID-19. Secara terperinci lantikan yang dibuat adalah seperti berikut:

- (a) pelantikan seramai 2,376 petugas kesihatan bagi skim Jururawat, Jururawat Pesara, Penolong Pegawai Perubatan, Juruteknologi Makmal Perubatan dan Pegawai Sains telah dilaksanakan pada April 2020;
- (b) pelantikan seramai 1,634 petugas kesihatan bagi skim Jururawat, Penolong Pegawai Perubatan, Juruteknologi

Makmal Perubatan, Penolong Pegawai Kesihatan Persekitaran telah dilaksanakan pada Oktober 2020;

- (c) seramai 485 petugas kesihatan lagi sedang diuruskan pelantikannya yang meliputi skim Juruteknologi Makmal Perubatan, Pegawai Sains dan Juru X-Ray; dan
- (d) selain itu, KKM juga membeli perkhidmatan (contract for services) daripada sejumlah 44 Pengamal Perubatan Swasta yang dilaksanakan untuk tempoh 3 bulan dan 200 Pegawai Psikologi (Kaunseling) yang dilaksanakan untuk tempoh 6 bulan.

2. Kerajaan turut bersetuju meluluskan penyambungan kontrak secara *one-off* enam (6) bulan lagi bagi sejumlah 2,070 Pegawai Perubatan, Pegawai Pergigian dan Pegawai Farmasi dengan kos sebanyak RM81 juta yang ditanggung menerusi peruntukan Kumpulan Wang COVID-19.

3. KKM sentiasa menghargai jasa dan khidmat petugas kesihatan yang dilantik secara kontrak. KKM tertakluk kepada kekosongan dan pewujudan jawatan tetap dari masa ke semasa bersedia memperakukan pegawai lantikan kontrak yang memenuhi syarat dan kriteria ditetapkan kepada Pihak Berkuasa Melantik untuk dilantik secara tetap.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH : 9 DISEMBER 2020 (RABU)

SOALAN

Minta **MENTERI PERTANIAN DAN INDUSTRI MAKANAN**
menyatakan :-

- (a) apakah kaedah serta kerjasama Kerajaan Pusat (JPSM, JPS, ALAM SEKITAR & SUMBER ASLI, PERTANIAN, JMG) dengan negeri untuk jangka masa pendek, sederhana dan panjang sementara menunggu RUU yang berkaitan diluluskan, untuk menjadikan pertanian secara lestari bagi tidak merosakkan sumber air. Nyatakan tindakan dan langkah ini secara terperinci; dan
- (b) apakah usaha-usaha yang diambil untuk mengalakkan penanaman sayur-sayuran dengan menggunakan teknologi moden.

JAWAPAN

Tuan Yang Dipertua,

1. Untuk makluman Ahli Yang Berhormat, bagi menggalakkan amalan pertanian secara lestari supaya tidak merosakkan sumber air, Kementerian Pertanian dan Industri Makanan (MAFI) melalui Jabatan Pertanian (DOA) telah mengambil beberapa tindakan dalam mengawal punca pencemaran tidak tetap (*non-point source*) daripada air larian hujan (*surface run-off*) yang membawa bahan pencemar seperti baki baja dan racun ke sungai atau tasik melalui tanah yang terhakis.

2. Beberapa tindakan dan langkah yang telah diambil oleh Kementerian adalah seperti berikut:

- (i) ***Untuk jangka masa pendek***, pensijilan ladang dengan myGAP dan myOrganic yang menekankan pengurusan kualiti air melalui khidmat nasihat teknikal;
- (ii) ***Untuk jangka masa sederhana***, pengurusan perosak, penyakit dan rumpai secara bersepadu atau *Integrated Pest Management* (IPM), iaitu kawalan perosak secara biologi dengan penggunaan bahan kimia yang minimum; dan
- (iii) ***Untuk jangka masa panjang***, DOA telah bekerjasama dengan pelbagai jabatan dan agensi Persekutuan dalam menyediakan Garis Panduan Pembangunan Pertanian di Tanah Bercerun sebagai panduan atau rujukan dengan menekankan aspek penggunaan sumber tanah secara mampan berteraskan kepada Amalan Pertanian Baik. Garis panduan ini menerangkan kaedah kawalan hakisan secara agronomi dan mekanikal di kawasan pertanian bagi mengawal hakisan dan mengurangkan pemendakan tanah di sungai atau tasik yang boleh menjejaskan kualiti sumber air.

3. Dalam usaha untuk menggalakkan penanaman sayur-sayuran dengan menggunakan teknologi moden, Kementerian telah melaksanakan beberapa inisiatif bagi tujuan tersebut seperti berikut:

- (i) Penggunaan sistem dalam penanaman sayur-sayuran seperti fertigasi, hidroponik, aeroponik dan akuaponik serta sistem penanaman secara menegak (*vertical farming*). Kementerian turut memberikan insentif teknologi melalui pelaksanaan Projek Bantuan Peningkatan Hasil Sayur dan Projek Pertanian Bandar bagi membantu usahawan membangunkan sistem fertigasi;
- (ii) Kementerian juga bekerjasama dengan pihak swasta, agensi penyelidikan dan institut pengajian bagi mengenalpasti teknologi-teknologi terkini yang sesuai untuk diguna dan diaplikasi mengikut kaedah yang bersesuaian seperti penanaman sayur-sayuran secara menegak (*vertical farming*) dan kilang tanaman (*plant factory*). Teknologi yang sesuai akan disalurkan kepada golongan sasar melalui aktiviti pengembangan dengan pelaksanaan melalui latihan secara kursus, seminar dan khidmat nasihat yang dijalankan; dan
- (iii) Selain itu, Kementerian juga telah merangka projek-projek berteraskan teknologi moden di bawah Rancangan Malaysia Kedua Belas (RMK-12) dengan menekankan elemen Revolusi Perindustrian 4.0 (IR 4.0). Seiring dengan perkembangan semasa, sistem fertigasi kini boleh diintegrasikan dengan teknologi seperti automasi, robotik, *artificial intelligence* (AI) dan *internet of things* (IoT) bagi meningkatkan kecekapan ladang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN EMPATBELAS**

PERTANYAAN : JAWAB LISAN

**DARIPADA : YB DATO' SRI RICHARD RIOT ANAK JAEM
(SERIAN)**

TARIKH : 9 DISEMBER 2020 (RABU)

SOALAN

DATO' SRI RICHARD RIOT ANAK JAEM [SERIAN] minta **MENTERI DALAM NEGERI** menyatakan perkembangan terkini tentang Perjanjian Lintas Batas (*Border Crossing Agreement* - BCA) di antara Malaysia dan Indonesia khususnya di pintu masuk antarabangsa Tebedu-Entikong.

JAWAPAN

Tuan Yang Di Pertua,

Untuk makluman Ahli Yang Berhormat, Perjanjian Lintas Batas Malaysia-Indonesia (*Border Cross Agreement* - BCA) telah ditandatangani pertama kali pada 26 Mei 1967 bertempat di Jakarta, Republik Indonesia bertujuan untuk memudahkan pergerakan keluar masuk penduduk-penduduk di kawasan sempadan Malaysia dan Indonesia. Sejak pelaksanaan kali pertama tersebut, sebanyak dua kali semakan telah dibuat dengan persetujuan kedua-dua negara iaitu pada tahun 1984 dan 2006.

Antara intipati utama dalam terma perjanjian tersebut adalah keperluan untuk menyenaraikan semua pintu masuk dan keluar di sempadan Malaysia-Indonesia yang membenarkan penggunaan Pas Lintas Sempadan (PLS) di kalangan penduduk setempat. Penyenaraian pintu masuk dan keluar di dalam dokumen perjanjian berkenaan adalah penting

SOALAN NO : 15

selaras dengan pengeluaran, penggunaan dan pengoperasian PLS serta kawalan di pintu masuk dan keluar oleh agensi penguatkuasa kedua-dua negara. Mengambil kira keutamaan untuk menyegerakan pemetraian BCA tersebut, kedua-dua negara bersetuju supaya hanya pintu masuk dan keluar yang diwartakan sahaja yang akan disenaraikan dalam lampiran BCA.

Sehingga kini, Kerajaan Republik Indonesia (RI) dan Malaysia telah mengadakan enam sesi rundingan bagi membincangkan draf Perjanjian BCA berkenaan. Setiap sesi rundingan dua hala tersebut melibatkan wakil-wakil dari kementerian / agensi pusat dan Kerajaan Negeri yang berkaitan seperti Pejabat Penasihat Undang-Undang Kementerian, Kementerian Kesihatan Malaysia (KKM), Jabatan Kastam Diraja Malaysia (JKDM), Majlis Keselamatan Negara (MKN), Jabatan Ketua Menteri Sarawak, Jabatan Ketua Menteri Sabah, Jabatan Imigresen Malaysia (JIM) serta Jabatan Imigresen Negeri Sabah dan Sarawak.

Draf terkini Perjanjian BCA tersebut telah disemak Jabatan Peguam Negara pada bulan Oktober 2019 dan telah dikemukakan kepada pihak Indonesia untuk penelitian dan persetujuan. Seperti mana kelaziman, setelah memperoleh persetujuan kedua-dua pihak, satu Memorandum Jemaah Menteri bagi Malaysia menandatangani dan meratifikasi *Agreement Between The Government of Malaysia and The Government of The Republic of Indonesia On Border* (BCA) akan dibentangkan dalam Mesyuarat Jemaah Menteri sebelum ianya ditandatangani.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 9 DISEMBER 2020 (RABU)

SOALAN

TUAN LIM LIP ENG [KEPONG] minta **MENTERI KANAN PERDAGANGAN ANTARABANGSA DAN INDUSTRI** menyatakan jumlah jualan kenderaan baharu mengikut bulan bagi tahun 2020 dan berbanding jumlah yang dicatatkan pada tiap-tiap bulan bagi tahun lalu.

JAWAPAN

Tuan Yang di-Pertua,

1. Untuk makluman Yang Berhormat, berdasarkan rekod *Malaysian Automotive Association* (MAA), jumlah keseluruhan jualan kenderaan penumpang dan kenderaan perdagangan bagi tempoh Januari sehingga Oktober 2020 adalah sebanyak **398,159** unit. Bagi tempoh yang sama pada tahun 2019, jumlahnya adalah sebanyak **496,855** unit. Perbandingan jumlah jualan mengikut bulan bagi tempoh Januari sehingga Oktober tahun 2020 dan 2019 adalah seperti berikut:

Bulan	Tahun 2019 (unit)	Tahun 2020 (unit)	Perbezaan Jumlah (unit)
Januari	48,450	42,867	turun 5,583 (-11.5%)
Februari	39,810	41,143	naik 1,333 (+3.3%)
Mac	54,776	22,518	turun 32,258 (-58.9%)
April	49,935	143	turun 49,792 (-99.7%)
Mei	60,760	23,318	turun 37,442 (-61.6%)
Jun	42,586	44,704	naik 2,118 (+4.9%)
Julai	50,854	57,552	naik 6,698 (+13.7%)
Ogos	51,148	52,800	naik 1,652 (+3.2%)
September	44,666	56,444	naik 11,778 (+26.4%)
Oktober	53,870	56,670	naik 2,800 (+5.2%)
JUMLAH	496,855	398,159	turun 98,696 (-19.9%)

Sumber: *Malaysian Automotive Association (MAA)*

2. Bagi motosikal pula, jumlah jualan keseluruhan yang direkodkan oleh *Motorcycle & Scooter Assemblers and Distributors Association of Malaysia (MASAAM)* bagi tempoh Januari sehingga Oktober 2020 adalah sebanyak **390,828** unit berbanding **450,691** unit bagi tempoh yang sama pada tahun 2019. Perbandingan jumlah jualan mengikut bulan bagi tempoh Januari sehingga Oktober tahun 2020 dan 2019 adalah seperti berikut:

Bulan	Tahun 2019 (unit)	Tahun 2020 (unit)	Perbezaan Jumlah (unit)
Januari	48,605	47,207	turun 1,398 (-2.9%)
Februari	36,954	51,843	naik 14,889 (+40.3%)
Mac	47,157	26,697	turun 20,460 (-43.4%)
April	43,743	0	turun 43,743 (-100%)
Mei	47,136	19,507	turun 27,629 (-58.6%)
Jun	33,885	42,190	naik 8,305 (+24.5%)
Julai	50,627	47,640	turun 2,987 (-5.9%)
Ogos	48,530	46,987	turun 1,543 (-3.2%)
September	43,327	50,670	naik 7,343 (+16.9%)
Oktober	50,727	58,087	naik 7,360 (+14.6%)
JUMLAH	450,691	390,828	turun 59,863 (-13.3%)

Sumber: *Motorcycle & Scooter Assemblers and Distributors Association of Malaysia (MASAAM)*

3. Penurunan jumlah jualan kenderaan yang mendadak pada bulan Mac, April dan Mei 2020 berbanding bulan yang sama pada tahun 2019 adalah disebabkan berlakunya pelaksanaan Perintah Kawalan Pergerakan (PKP) kesan daripada penularan wabak COVID-19 di seluruh dunia dan ini telah memberi kesan kepada industri automotif tempatan.

4. Namun, kenaikan penjualan kenderaan dapat dilihat bermula Jun 2020 berikutan langkah yang dilaksanakan oleh kerajaan melalui Pelan Jana Semula Ekonomi Negara (PENJANA) yang memberi pengecualian 100% Cukai Jualan dan Perkhidmatan kepada kenderaan pemasangan tempatan (*Completely Knocked Down* - CKD) dan 50% pengecualian Cukai Jualan dan Perkhidmatan bagi kenderaan import (*Completely Built-Up* - CBU).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 9 DISEMBER 2020 (RABU)

SOALAN

Minta **MENTERI PERTANIAN DAN INDUSTRI MAKANAN** menyatakan adakah Kementerian bercadang untuk menjadikan tanaman kurma sebagai tanaman komoditi baru di negara ini memandangkan potensinya daripada segi ekonomi termasuk hasil yang lumayan dan boleh meningkatkan pendapatan penduduk luar bandar khususnya di kawasan pertanian seperti di Parlimen Sabak Bernam.

JAWAPAN

Tuan Yang Dipertua,

1. Untuk makluman Ahli Yang Berhormat, buat masa ini Kementerian belum bercadang menjadikan tanaman kurma sebagai tanaman komoditi baru memandangkan ia memerlukan tempoh masa yang lama untuk mula berbunga (minimum umur pokok 10 tahun) dengan peratus kejayaan berbuah hanya 50%. Pokok kurma memerlukan cuaca panas melebihi 30°C dengan kelembapan udara yang rendah serta suhu sejuk di waktu malam selama 4 bulan untuk merangsang pembentukan bunga dan pembesaran buah.
2. Pokok kurma juga perlu ditanam secara berkelompok memandangkan ia bersifat *dioecious* (pokok jantan dan pokok betina adalah berbeza). Oleh itu, kedua-dua pokok diperlukan supaya pokok

kurma dapat berbuah. Pendebungaan secara manual perlu dibuat kerana ia tidak berbau dan tidak dapat menarik perhatian agen pendebungaan seperti lebah.

3. Usaha membawa masuk pokok kurma ke negara ini juga dikesan menyumbang kepada kemasukan perosak Kumbang Merah Palma (*Rhynchophorus ferrugineus*). Pada tahun 2011, perosak ini telah menyerang 55,000 pokok kelapa di Negeri Terengganu berdasarkan pengesanan pada 800 hektar penanaman (ladang, kampung, taman dan FELDA).

4. Jabatan Pertanian tidak melaksanakan projek penanaman pokok kurma di Malaysia. Aktiviti penanaman pokok kurma yang pernah dilaporkan di Malaysia diusahakan secara individu dan kecil-kecilan. Hasil kejayaan pengusaha tidak dapat dipastikan kerana bilangan pokok yang ditanam sangat sedikit dan tidak cukup untuk mengukur hasil kejayaan.

5. Sehubungan dengan itu, Kementerian berpandangan kajian atau pemerhatian yang lebih terperinci mengenai pertumbuhan, hasil tanaman dan ekonomi terutamanya kos pengeluaran perlu dilaksanakan terlebih dahulu bagi menilai potensi sebelum dapat menjadikan tanaman kurma sebagai tanaman komoditi baru dan ditanam secara komersial oleh petani.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 9 DISEMBER 2020 (RABU)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI KESIHATAN** menyatakan apakah langkah-langkah yang telah diambil oleh Kementerian Kesihatan untuk meningkatkan penyertaan perokok yang ingin berhenti merokok ke dalam program berhenti merokok seperti mQuit dan sejauh manakah keberkesanan langkah-langkah tersebut.

JAWAPAN

Tuan Yang di-Pertua,

1. Pihak KKM telah mengambil **tiga langkah utama** bagi meningkatkan jumlah penyertaan perokok yang ingin berhenti merokok ke dalam program berhenti merokok iaitu:

- i. **Meningkatkan kebolehcapaian perkhidmatan** berhenti merokok dengan memperluaskan perkhidmatan di klinik kesihatan dan hospital KKM yang menjalankan rawatan berhenti merokok serta menjalinkan kerjasama pintar bersama perkhidmatan swasta dalam menjalankan perkhidmatan berhenti merokok;
- ii. **Menjalankan aktiviti promosi** bagi menghebahkan perkhidmatan berhenti merokok melalui media cetak dan media sosial; dan
- iii. **Menyediakan laman sesawang khusus** iaitu portal jomquit.com melalui kerjasama pintar antara agensi swasta dan badan profesional bagi memudahkan interaksi serta pendaftaran ke perkhidmatan berhenti merokok mQuit.

2. Perkhidmatan rawatan berhenti merokok telah dilaksanakan di Malaysia sejak tahun 2000. Ia telah dimulakan di klinik kesihatan dan diperluaskan di hospital-hospital KKM. Perkhidmatan ini seterusnya diperkukuhkan bagi meningkatkan kebolehcapaian dengan jalinan kerjasama pintar bersama perkhidmatan swasta. Perkhidmatan Berhenti Merokok ini dinamakan perkhidmatan mQuit dan telah bermula sejak tahun 2015.

3. Perluasan perkhidmatan yang dilaksanakan ini bukan sahaja dapat menggalakkan penyertaan perokok ke perkhidmatan berhenti merokok malahan ia adalah selaras dengan Artikel 14, *World Health Organization Framework Convention on Tobacco Control (WHO FCTC)*.

4. Perkhidmatan Berhenti Merokok mQuit telah dirancang secara berfasa bermula fasa pertama iaitu daripada tahun 2015 sehingga 2017 dengan matlamat meningkatkan kebolehcapaian rakyat ke perkhidmatan berhenti merokok di swasta. Seterusnya, Perkhidmatan Berhenti Merokok mQuit ini dilanjutkan ke fasa kedua bermula tahun 2017 sehingga 2020 dengan tumpuan khusus bagi menggalakkan perokok di sektor pekerjaan mendapatkan rawatan berhenti merokok di fasiliti yang telah disediakan. Terkini, Perkhidmatan Berhenti Merokok mQuit akan memasuki fasa ketiga pada tahun 2021 sehingga 2025 dengan menggalakkan penyertaan perokok ke Perkhidmatan Berhenti Merokok mQuit melalui sistem rangkaian khusus atau *Uberization*.

5. Bagi menggalakkan penyertaan perokok ke Perkhidmatan Berhenti Merokok mQuit, informasi berkaitan pautan ke laman sesawang '**jomquit**' telah dilaksanakan melalui paparan khusus di papan tanda larangan merokok. Papan tanda larangan merokok ini telah dipamerkan di semua tempat-tempat larangan merokok. Sehingga kini, lebih 100,000 keping tanda larangan merokok baharu telah diedar dan dipamerkan di seluruh negara.

6. Selaras dengan situasi semasa pandemik COVID-19, informasi berkaitan merokok dan jangkitan COVID-19 dan cara penyertaan kepada Perkhidmatan Berhenti Merokok mQuit juga telah dimuatnaik melalui aplikasi MySejahtera.

7. Selain itu, bagi memudahkan akses ke pendaftaran Perkhidmatan Berhenti Merokok mQuit, satu laman sesawang khusus iaitu portal '**jomquit.com**' telah dibangunkan menerusi kerjasama pintar bersama-sama agensi swasta dan badan profesional. Capaian portal jomquit.com ini juga telah di masukkan di bawah aplikasi MySejahtera.

Tuan Yang di-Pertua,

8. Kesemua langkah-langkah yang telah dijalankan di atas telah menunjukkan keberkesanan seperti berikut:

- a. Jumlah perokok yang mendaftar bagi mendapatkan rawatan berhenti merokok telah meningkat daripada 10,240 orang pada

SOALAN NO : 18

tahun 2017 kepada 20,032 orang pada tahun 2018 dan seterusnya kepada 22,601 orang pada tahun 2019.

- b. Melalui promosi penggalakkan berhenti merokok semasa pandemik COVID-19, seramai lebih 3,442 orang telah mendaftar melalui laman sesawang Jomquit bermula 1 Januari 2020 sehingga 21 Oktober 2020 berbanding dengan keseluruhan tahun 2019 iaitu seramai 1,678 orang perokok.
 - c. Daripada jumlah pendaftaran pada tahun 2020 (3,422), sebanyak 3,254 orang atau 95% telah mendaftar sepanjang tempoh pelaksanaan Perintah Kawalan Pergerakan (PKP) bermula 18 Mac 2020.
7. Kesemua langkah-langkah yang dinyatakan telah dilaksanakan oleh rakan kongsi strategik Perkhidmatan Berhenti Merokok mQuit tanpa sebarang implikasi kewangan kepada Kementerian Kesihatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : YB DATO' SRI HASAN BIN ARIFIN
[ROMPIN]**

TARIKH : 9 DISEMBER 2020 (RABU)

SOALAN

DATO' SRI HASAN BIN ARIFIN [ROMPIN] minta **MENTERI SUMBER MANUSIA** menyatakan berapa ramai pekerja yang kehilangan pekerjaan telah kembali mendapat pekerjaan hasil dari inisiatif **PENJANA**.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, berdasarkan rekod **Sistem Insurans Pekerjaan (SIP) PERKESO**, seramai **99,696** orang pekerja telah kehilangan pekerjaan dari Januari 2020 sehingga 27 November 2020.

2. Sehingga 27 November 2020, PERKESO telah **berjaya menempatkan** seramai **120,296** orang menerusi Program Penempatan Pekerjaan. Penempatan ini adalah termasuk mereka yang menganggur, kehilangan pekerjaan dan pencarum SIP menerusi portal *MYFutureJobs*. Manakala, bermula Jun 2020 sehingga 27 November 2020, **Program Insentif Pengambilan Pekerja (Hiring Incentives)** telah berjaya menempatkan seramai 90,930 orang pekerja. Daripada jumlah tersebut, seramai 99,696 orang yang kehilangan pekerjaan dan pencari kerja awam melalui temuduga terbuka telah dapat ditempatkan semula melalui inisiatif ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : TUAN WONG TACK [BENTONG]

TARIKH : 9 DISEMBER 2020 (RABU)

SOALAN

TUAN WONG TACK [BENTONG] minta **MENTERI ALAM SEKITAR DAN AIR** menyatakan perancangan Kementerian untuk memastikan kawasan tadahan air dilindungi, khasnya di Bentong. Ini memandangkan Bentong bukan sahaja membekalkan air mentah untuk kegunaan penduduk tempatan tetapi juga untuk pengguna-pengguna di Lembah Klang.

JAWAPAN

Tuan Yang Di-Pertua,

1. Pertamanya, ingin saya jelaskan bahawa pengawasan ke atas kawasan tadahan air adalah di bawah bidang kuasa kerajaan negeri. Namun, Kementerian Alam Sekitar dan Air (KASA) amat memandang serius aktiviti-aktiviti yang boleh mendatangkan impak negatif kepada kawasan tadahan air. Dalam hal ini, Kementerian melalui Jabatan Alam Sekitar (JAS) akan terus menjalankan penguatkuasaan Akta Kualiti Alam Sekeliling 1974 (AKAS 1974) ke atas premis-premis dan aktiviti-aktiviti yang tertakluk kepada perundangan tersebut.

2. Selain itu, aktiviti seperti pembukaan tanah bagi tujuan pertanian dan sebagainya yang tidak tertakluk kepada AKAS 1974, aktiviti tersebut juga boleh menyumbang kepada hakisan dan kelodakan yang boleh menjejaskan kualiti air dan kawalan sewajarnya perlu dilaksanakan. Dalam hal ini, peranan

dan kerjasama semua pihak termasuk Kerajaan Negeri dan pemilik projek adalah penting dalam usaha untuk melindungi kualiti air terutamanya di kawasan tadahan air.

3. Selain itu, KASA juga mengesyorkan supaya semua negeri mewartakan kawasan tadahan air dan melakukan kawalan melalui penguatkuasaan sebagai langkah melindungi kawasan tersebut.

Sekian. Terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : DR. KELVIN YII LEE WUEN
[BANDAR KUCHING]

TARIKH : 9 DISEMBER 2020 (RABU)

SOALAN

DR. KELVIN YII LEE WUEN [Bandar Kuching] minta MENTERI KESIHATAN menyatakan kesediaan dan pelan Kementerian untuk mengendali kenaikan kes dan juga kematian (*mortality*) disebabkan penyakit bukan COVID-19, terutamanya mereka yang terlepas rawatan atau “*check up*” disebabkan COVID-19. Berapakah jangkaan pertambahan kadar kematian disebabkan kes bukan COVID-19 dan apakah pelan Kementerian terhadap isu ini.

JAWAPAN

Tuan Yang di-Pertua,

1. Walaupun negara dilanda pandemik COVID-19, Kementerian Kesihatan Malaysia (KKM) **tidak menghentikan perkhidmatan kepada pesakit bukan COVID-19** terutama bagi kes-kes kecemasan dan separa kecemasan di semua hospital KKM di seluruh negara.

2. Bagi kes-kes bukan COVID-19, **rawatan diteruskan** di hospital yang tidak menjalankan perkhidmatan pengurusan pesakit COVID-19 melalui mobilisasi peralatan dan pakar perubatan. Selain itu, di Sabah, KKM telah bekerjasama dengan pihak Angkatan Tentera Malaysia, di mana sebuah **Hospital Medan** telah didirikan di Tawau, Sabah bagi menyediakan perkhidmatan kepada pesakit bukan COVID 19 terutamanya kes-kes kecemasan yang memerlukan pembedahan.

SOALAN NO : 21

3. Berdasarkan statistik, didapati **tiada peningkatan kadar kematian pesakit** di hospital-hospital KKM dari bulan Januari sehingga bulan September 2020 berbanding bilangan kematian di hospital dalam tempoh yang sama pada tahun 2019.
4. KKM juga telah menyediakan dan melaksanakan inisiatif-inisiatif norma baru susulan Perintah Kawalan Pergerakan Bersyarat (PKPB) serta Perintah Kawalan Pergerakan Pemulihan (PKPP), seperti berikut;
- i. Perubahan katil COVID-19 di Hospital COVID-19 kepada katil bukan COVID-19 secara dinamik untuk merawat penyakit bukan COVID-19, selaras dengan jumlah semasa kes positif COVID-19 samada bertambah atau berkurang;
 - ii. **Pemanjangan waktu operasi klinik pakar/ dewan bedah selepas waktu pejabat** termasuk pada hari **Sabtu** bagi hospital-hospital tertentu;
 - iii. **Mengoptimalkan penggunaan hospital-hospital bukan pakar** untuk menjalankan prosedur atau pembedahan tertentu melalui konsep Hospital Kluster;
 - iv. **Penyumberluaran perkhidmatan tertentu kepada hospital swasta** untuk mengurangkan waktu menunggu prosedur atau pembedahan;
 - v. **Perkhidmatan secara maya, termasuk 'virtual clinic'** telah dimulakan dan akan diperluaskan di beberapa hospital serta klinik kesihatan; dan
 - vi. **Menghubungi pesakit** secara telefon atau khidmat pesanan ringkas untuk memberikan pesakit tarikh baru temujanji.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN IGNATIUS DORELL LEIKING
(PENAMPANG)**

TARIKH : 9 DISEMBER 2020 (RABU)

SOALAN

DATUK IGNATIUS DARELL LEIKING [PENAMPANG] minta **MENTERI DALAM NEGERI** menyatakan status kajian, penelitian dan jangkaan masa keputusan daripada pihak KDN terhadap permohonan yang dikemukakan kepada Menteri Dalam Negeri pada 2019 bagi menghapuskan sekatan ke atas buku 'The Golden Son of the Kadazan' tulisan Bernard Sta Maria.

JAWAPAN

Tuan Yang Di Pertua,

Sebagaimana jawapan yang telah dikemukakan terhadap pertanyaan Yang Berhormat pada sesi yang lepas, Kementerian Dalam Negeri telah mengambil inisiatif membuat kajian dan penelitian semula terhadap penerbitan tersebut serta memperhalusi setiap aspek dari sudut keselamatan dan undang-undang selain turut melibatkan pakar-pakar dalam bidang berkaitan.

Kajian dan penelitian yang komprehensif ini adalah amat signifikan bagi memastikan setiap keputusan yang diambil adalah tepat dan apa yang lebih utama mendasari misi Kementerian dalam memastikan keselamatan dan keamanan negara terjamin.

Buat masa ini, Kementerian masih mengekalkan keputusan yang telah diputuskan sebelum ini sehingga satu keputusan baharu diambil.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 9 DISEMBER 2020 (RABU)

SOALAN

YB TUAN HASSAN BIN ABDUL KARIM [PASIR GUDANG] minta **MENTERI SUMBER MANUSIA** menyatakan apakah inisiatif-inisiatif yang telah diambil oleh Kerajaan untuk memastikan syarikat-syarikat di Malaysia mengambil semula 78,800 orang pekerja tempatan yang telah diberhentikan kerja akibat Pandemik COVID-19 dan 50,000 orang graduan yang dihasilkan oleh negara setiap tahun.

JAWAPAN

Tuan Yang di-Pertua,

Untuk makluman Ahli Yang Berhormat,

1. Kerajaan melalui PERKESO telah melaksanakan Program Insentif Pengambilan Pekerja dan Program Latihan di bawah Program Insentif PenjanaKerjaya bagi membantu syarikat-syarikat di Malaysia mengambil semula pekerja-pekerja tempatan yang telah diberhentikan kerja akibat Pandemik COVID-19.
2. PenjanaKerjaya di bawah Pelan Jana Semula Ekonomi Negara (PENJANA) adalah bertujuan merangsang permintaan pekerjaankalangan majikan dan meningkatkan peluang pekerjaan serta kebolehpekerjaan di

kalangan pencari kerja tempatan. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Terdapat empat (4) kategori insentif di bawah PenjanaKerjaya iaitu:

a. *MyApprentice*

Insentif Perantis bagi majikan yang mengambil pencari kerja tempatan secara perantis dalam kalangan lepasan sekolah dan graduan.

b. *HireMalaysia*

- i. Insentif Pengambilan Pekerja tempatan di bawah umur 40 tahun;
- ii. Insentif Pengambilan Pekerja tempatan berumur 40 tahun sehingga 60 tahun; dan
- iii. Insentif Pengambilan Pekerja tempatan dalam golongan mudah terjejas terutamanya orang kurang upaya (OKU) dan peserta program *Return to Work* PERKESO.

c. *Bantuan Mobiliti*

Bayaran *One-Off* kepada pekerja melalui majikan yang berpindah dari lokasi tempat pemastautin pencari kerja.

d. *Program Latihan*

Menyediakan latihan semula (*reskilling and upskilling*) berdasarkan keperluan majikan dan pekerja yang diambil di bawah kategori #HireMalaysia.

Tuan Yang di-Pertua,

3. Kementerian juga melalui Pembangunan Sumber Manusia Berhad (PSMB), telah melancarkan inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling and reskilling*) iaitu *Place and Train*, *B40 Development*, *SME Development*, *Industry Revolution 4.0* dan Gerak Insan Gemilang (GIG).

4. Dalam usaha kerajaan untuk memperkasakan rakyat, Kementerian melalui Pembangunan Sumber Manusia Berhad (PSMB) telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak dua (2) Billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah dua ratus ribu (200,000) belia dan golongan penganggur.

5. PENJANA *Upskilling & Reskilling* akan membantu belia dan golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah lima ratus (500) juta peruntukan yang telah disalurkan dan seratus dua ribu (102,000) pelatih yang telah diluluskan untuk mengikuti pelbagai program dibawah PENJANA *Upskilling & Reskilling* ini. Langkah ini dijangka akan terus membantu mengurangkan kadar pengangguran Negara ke aras yang lebih stabil.

Tuan Yang di-Pertua,

6. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta memantau keberkesanan inisiatif-inisiatif tersebut.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN

DARIPADA : YB DATUK DR. HASAN BIN BAHROM [TAMPIN]

TARIKH : 9 DISEMBER 2020 (RABU)

SOALAN

DATUK DR. HASAN BIN BAHROM [TAMPIN] minta **MENTERI SUMBER MANUSIA** menyatakan apakah tindakan yang telah, sedang dan akan dilakukan secara menyeluruh dan strategik yang dilakukan oleh Kementerian bagi mengatasi masalah pengangguran bandar dan luar bandar.

JAWAPAN

Tuan Yang di-Pertua,

1. Jabatan Perangkaan Malaysia (DOSM) menganggarkan julat maksimum kadar pengangguran adalah dalam lingkungan 3.5% hingga 5.5% pada tahun ini susulan daripada pandemik Covid-19.
2. Berdasarkan Survei Tenaga Buruh (STB) DOSM, pada suku tahun pertama 2020 (ST1 2020), kadar pengangguran negara meningkat kepada 3.5% dengan kadar pengangguran di bandar pada 3.4% dan luar bandar 3.8%. Bilangan penganggur yang direkodkan dalam tempoh tersebut adalah seramai 546.6 ribu orang dengan 428.4 ribu penganggur di bandar manakala 118.2 ribu penganggur di luar bandar.
3. Kedudukan pengangguran negara pada suku tahun kedua 2020 (ST2 2020) meningkat kepada 791.8 ribu orang dengan kadar pengangguran pada 5.1%. Dari segi pengangguran mengikut strata menunjukkan bilangan penganggur di bandar meningkat kepada 644.2 ribu orang dengan kadar 5.2%. Begitu juga, pengangguran di luar bandar juga mencatatkan peningkatan dengan bilangan penganggur seramai 147.6 ribu orang pada kadar pengangguran 4.6%.
4. Dalam mendepani situasi pengangguran di Malaysia serta memperkasakan rakyat, Kerajaan telah mengumumkan Pelan Jana Semula Ekonomi Negara (PENJANA) bertujuan membantu mereka yang telah kehilangan sumber pendapatan pekerjaan, melindungi pekerjaan dan meningkatkan kemahiran . Rakyat akan dapat memanfaatkan peluang semasa ekonomi beransur pulih melalui inisiatif PENJANA tersebut.
5. Lima (5) inisiatif PENJANA di bawah Kementerian Sumber Manusia (KSM) adalah Pelaksanaan Program Subsidi Upah, Manaik Taraf Portal Perkhidmatan Pekerjaan Negara, Program Insentif Pengambilan Pekerja dan Bantuan Latihan , Program Kemahiran dan Peningkatan Kemahiran dan Perlindungan Sosial dan Latihan bagi Pekerja Ekonomi Gig.

6. Program Subsidi Upah (PSU 1.0) dan pelanjutan Program Subsidi Upah (PSU) 2.0 telah membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program PSU 2.0 telah melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,569 syarikat dan 2.73 juta pekerja telah menerima manfaat ini. Sehingga 27 November 2020, PERKESO telah menyalurkan bantuan kepada 77,882 majikan dan 782,904 pekerja melalui program PSU 2.0.

7. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu seramai 90,930 pekerja sehingga 27 November 2020.

8. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (upskilling dan reskilling) iaitu Place and Train, B40 Development, SME Development, Industry Revolution 4.0 dan Gerak Insan Gemilang (GIG).

Tuan Yang di-Pertua,

9. Dalam usaha kerajaan untuk memperkasakan rakyat, Kementerian melalui Pembangunan Sumber Manusia Berhad (PSMB) telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak 2 Billion. Program kemahiran dan peningkatan kemahiran ini sedang dilaksanakan merentasi 8 Kementerian dan Agensi dan akan memanfaatkan sejumlah 200 ribu belia dan golongan penganggur.

10. PENJANA *Upskilling & Reskilling* akan membantu belia dan golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekal pekerjaan (*job retention*). Sehingga kini, sejumlah 500 juta peruntukan yang telah disalurkan dan 102,000 pelatih yang telah diluluskan untuk mengikuti pelbagai program dibawah PENJANA *Upskilling & Reskilling* ini. Langkah ini dijangka akan terus membantu mengurangkan kadar pengangguran Negara ke aras yang lebih stabil.

11. Program *upskilling* dan *reskilling* turut disediakan kepada golongan pekerja bagi mempertingkatkan kemahiran mereka untuk menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dijalankan secara berterusan supaya kemahiran yang diperolehi sentiasa bersesuaian dengan keperluan industri semasa. Ianya akan dapat membantu lepasan graduan mahupun golongan penganggur sedia ada dalam memasuki pasaran pekerjaan semula terutama dalam industri yang kurang terkesan dengan impak COVID-19.

Tuan Yang di-Pertua,

12. Kerajaan sedar bahawa perihal pendapatan, kesihatan, pendidikan dan keusahawanan adalah kompenen utama dalam usaha mengatasi pengangguran dan seterusnya kemiskinan. Sehubungan dengan itu, di bawah PENJANA *Upskilling & Reskilling*, terdapat beberapa Kementerian dan agensi yang menawarkan program keusahawanan seperti contoh Kementerian Pengajian Tinggi (KPT), Kementerian Pembangunan Usahawan dan Koperasi (MEDAC), Kementerian Pembangunan Luar Bandar (KPLB), Majlis Amanah Rakyat (MARA), Kementerian Belia dan Sukan (KBS), Pembangunan Sumber Manusia Berhad (PSMB) dan *Northern Corridor Implementation Authority* (NCIA).

13. *Northern Corridor Implementation Authority* (NCIA) contohnya telah melancarkan JomKerja@NCER dan JomNiaga@NCER sebagai pendekatan bersepadu untuk penciptaan dan pengekal pekerjaan,

memudahkan para peserta untuk mendapatkan pekerjaan segera dan memperoleh pendapatan yang lebih tinggi dalam jangka waktu yang singkat. Sehingga kini, 929 peserta telah menerima manfaat dari program ini. Program keusahawan seperti ini telah memanfaatkan rakyat samada yang berada di bandar mahupun di luar bandar.

14. Disamping inisiatif – inisiatif PENJANA yang sedang dilaksanakan, Kementerian juga akan memperluaskan akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat 562 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri. Pelaksanaan latihan-latihan kemahiran yang bersifat *internship* seperti Sistem Latihan Dual Nasional (SLDN) juga akan dipertingkatkan secara usahasama bersama industri dalam menghasilkan peluang pekerjaan berkemahiran tinggi.

15. Kementerian juga telah mengambil langkah proaktif bersama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

16. Kerajaan akan sentiasa berusaha untuk menyediakan pelan perancangan yang komprehensif dalam mengatasi pengangguran sama ada di bandar mahupun di luar bandar. Inisiatif dan isentif yang disediakan diharapkan dapat mengekalkan pekerja sedia ada serta menyediakan peluang pekerjaan kepada pekerja baharu. Keadaan ini diharapkan dapat memberi nafas baru kepada rakyat dalam meneruskan kelangsungan hidup dalam tempoh yang mencabar ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI ABDUL HADI BIN
AWANG [MARANG]**

TARIKH : 9 DISEMBER 2020 (RABU)

SOALAN

DATO' SERI HAJI ABDUL HADI BIN AWANG [MARANG] minta **MENTERI LUAR NEGERI** menyatakan apakah usaha yang telah dilaksanakan untuk meningkatkan kerjasama strategik dengan negara-negara ASEAN bagi mengukuhkan keselamatan serantau.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Marang di atas pertanyaan yang dikemukakan.

Tuan Yang di-Pertua,

2. Semasa perbincangan di peringkat antarabangsa dan terutamanya di peringkat ASEAN dan bersama Rakan-rakan Dialog ASEAN, saya sering menyuarakan keperluan kerjasama strategik, isu-isu keselamatan dan kestabilan serantau termasuk ancaman keganasan, ekonomi dan kewangan global, tenaga, perubahan iklim, jerebu rentas sempadan, keselamatan maritim, pengurusan bencana, jenayah rentas sempadan, perkembangan di Semenanjung Korea, Timur Tengah dan situasi di Laut China Selatan.

3. YAB Perdana Menteri semasa Sidang Kemuncak ASEAN yang diadakan secara persidangan video pada 22 Jun 2020, telah menekankan supaya ASEAN merangka segera Pelan Pemulihan Ekonomi Pasca COVID-19 bagi memberi tumpuan bukan sahaja kepada aspek kewangan, bahkan jaringan keselamatan sosial, jaminan makanan dan pendidikan kepada penduduk serantau. ASEAN juga perlu memastikan vaksin Covid-19, apabila sudah ada kelak, adalah pada harga berpatutan, boleh diakses dan dikongsi sama rata untuk semua.

4. Selain itu juga beliau telah menyuarakan pendirian Malaysia kepada rakan-rakan ASEAN berhubung keperluan untuk mencari pendekatan menyeluruh bagi memerangi dan membendung pergerakan orang yang tidak teratur untuk menangani sindiket pemerdagangan manusia yang mengeksploitasi mangsa pelarian. Beliau juga menegaskan sekiranya isu ini tidak dibendung, ia berpotensi berkembang untuk menjadi satu ancaman keselamatan rantau ini.

5. Saya juga telah menekankan keperluan kerjasama strategik untuk mengekalkan kestabilan dan keharmonian politik Negara-negara Anggota

ASEAN melalui mekanisme ASEAN yang sedia pada Mesyuarat Menteri-menteri Luar Negeri ke-53 / Pasca Persidangan Menteri-menteri Luar Negeri (PMC) dan Mesyuarat-mesyuarat Berkaitan serta Mesyuarat Forum Serantau ARF Ke-27 (*ASEAN Regional Forum*) yang berlangsung melalui persidangan video pada 9-12 September 2020 terutamanya dalam isu-isu yang telah diketengahkan oleh YAB Perdana Menteri.

6. Baru-baru ini, sewaktu mesyuarat Menteri-menteri Luar Negeri ASEAN bersama Setiausaha Agong Pertubuhan Bangsa-bangsa Bersatu (PBB) yang diadakan melalui persidangan video pada 21 Oktober 2020, saya telah menyentuh isu kerjasama antarabangsa dalam menangani impak COVID-19, serta pendirian Malaysia berhubung situasi semasa di Laut China Selatan, Wilayah Rakhine dan Palestin. Saya turut menzahirkan sokongan penuh Malaysia terhadap Triti Mengenai Pengharaman Senjata Nuklear, yang telah diratifikasi oleh Malaysia pada 30 September 2020 dan merakamkan penghargaan kepada semua pihak yang menyokong inisiatif "*Statement of Support to the UN Secretary-General's Appeal for a Global Ceasefire amid the COVID-19 Pandemic*" yang telah diterajui oleh Malaysia di platform PBB pada Jun 2020.

7. Malaysia, menerusi platform ASEAN, akan terus menyuarakan kepentingan kerjasama dalam isu-isu strategik dan keselamatan bagi membina keyakinan serta kesinambungan dalam memelihara keamanan dan kestabilan di rantau ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' MASIR KUJAT [SRI AMAN]

TARIKH : 9 DISEMBER 2020 (RABU)

SOALAN

Minta **MENTERI PERTANIAN DAN INDUSTRI MAKANAN** menyatakan apakah status pelaksanaan Projek Jelapang Padi di kawasan Stumbin-Tg. Bijat Sri Aman.

JAWAPAN

Tuan Yang Dipertua,

1. Untuk makluman Ahli Yang Berhormat, pihak Kawasan Pembangunan Pertanian Bersepadu (IADA) Batang Lupar merupakan peneraju utama sektor padi di Negeri Sarawak yang merangkumi kawasan penanaman padi di Stumbin, Bijat, Gran, Entulang, Seduku dan Lingga-Banting seluas 5,100 hektar.
2. Sehingga kini, Pakej Bijat-Stumbin Fasa 1 seluas 1,500 hektar telah siap dibangunkan dengan sistem pengairan hingga ke peringkat *secondary pipeline*. Manakala, Pakej Bijat-Stumbin Fasa 2 (Seduku) masih lagi dalam peringkat penyediaan '*detail design*' untuk dimasukkan dalam Makmal Pengurusan Nilai (*Value Engineering* atau VE) dan ianya dijangka akan ditender pada tahun 2021.
3. Beberapa kawasan di Tanjung Bijat seluas 196 hektar juga telah dilengkapi dengan *tertiary pipeline* melalui Projek Pemacu Pertanian (*Entry Point Project* - EPP11) yang telah dilaksanakan oleh Kementerian Pemodenan Pertanian, Tanah Adat Dan Pembangunan Wilayah (MANRED) Sarawak. Manakala, kerja-kerja di lapangan sedang dilaksanakan oleh syarikat Padiberas Nasional Berhad (BERNAS) sebagai syarikat peneraju.
4. Selain itu, pembangunan infrastruktur di kawasan Lingga-Banting berkeluasan 2,100 hektar dengan anggaran kos sebanyak RM270 juta akan dilaksanakan dalam tiga (3) fasa. Pakej Lingga-Banting Fasa 1 telah mula dilaksanakan mulai 23 Mac 2020 dan dijangka selesai sepenuhnya dalam tempoh 30 bulan. Manakala pelaksanaan Pakej Lingga-Banting Fasa 2 dan Fasa 3 pula akan dimohon dalam tempoh Rancangan Malaysia Ketiga Belas (RMKe-13) kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN

DARIPADA : TUAN M. KULASEGARAN [IPOH BARAT]

TARIKH : 9 DISEMBER 2020

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan langkah-langkah drastik yang akan diambil oleh Kementerian untuk memastikan agar setiap pekerja tempatan tidak menganggur.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Jabatan Perangkaan Malaysia (DOSM) menganggarkan julat maksimum kadar pengangguran adalah dalam lingkungan 3.5 peratus hingga 5.5 peratus pada tahun ini susulan daripada pandemik Covid-19.
2. Berdasarkan data terkini Survei Tenaga Buruh DOSM, kadar pengangguran di Malaysia pada bulan September 2020 turun 0.1 peratus kepada 4.6% berbanding Ogos 2020. Bilangan penganggur turun kepada 737.5 ribu orang pada September 2020 berbanding 741.6 ribu orang pada Ogos 2020.
3. Kerajaan telah menjangkakan impak Perintah Kawalan Pergerakan (PKP) terhadap ekonomi dan pekerjaan dari awal lagi, dan telah memperkenalkan beberapa inisiatif untuk membantu mengurangkan beban industri dan menjamin kelangsungan pekerjaan bagi tenaga kerja Malaysia seperti Pakej Rangsangan Ekonomi dan Pelan Jana Ekonomi Negara (PENJANA).

4. Antara inisiatif yang diperkenalkan adalah terdiri daripada **lima (5) inisiatif PENJANA berkaitan sumber manusia**. Pertama, **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 dan ke bawah. Kedua, **Menaik Taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja. Ketiga, **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan. Keempat, **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran dan kelima, **Perlindungan Sosial dan Latihan bagi Pekerja Ekonomi Gig** bagi menjamin keselamatan sosial dan kebajikan golongan pekerja ekonomi gig.

Untuk makluman Ahli Yang Berhormat,

5. Program Subsidi Upah (PSU 1.0) dan pelanjutan Program Subsidi Upah (PSU) 2.0 membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program ini melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,950 syarikat dan 2.73 juta pekerja telah menerima manfaat ini. Sehingga 27 November 2020, PERKESO telah menyalurkan bantuan kepada 77,882 majikan dan 782,904 pekerja melalui program PSU 2.0.

6. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu seramai 90,930 ribu pekerja sehingga 27 November 2020.

7. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling* dan *reskilling*) iaitu *Place and Train*, *B40 Development*, *SME Development*, *Industry Revolution 4.0* dan Gerak Insan Gemilang (GIG).

8. Dalam usaha kerajaan untuk memperkasakan rakyat, Kementerian juga telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak RM2 billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah 200,000 orang penerima latihan.

9. PENJANA *Upskilling & Reskilling* akan membantu golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah RM500 juta peruntukan telah disalurkan dan seramai 102,000 pelatih telah diluluskan untuk mengikuti pelbagai program dibawah PENJANA *Upskilling & Reskilling*. Langkah ini dijangka akan terus membantu mengurangkan kadar pengangguran Negara ke aras yang lebih stabil.

10. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta memantau keberkesanan inisiatif-inisiatif tersebut.

Tuan Yang di-Pertua,

11. Melalui Belanjawan 2021 yang diumumkan baru-baru ini, Kerajaan akan meneruskan inisiatif pengambilan pekerja di bawah PERKESO yang kini dikenali sebagai PenjanaKerjaya dengan peruntukan sebanyak RM2 bilion ringgit. Inisiatif ini dijangka dapat membuka peluang pekerjaan kepada 250 ribu pencari kerja.

12. Kerajaan juga akan melanjutkan pelaksanaan Program Subsidi Upah selama tiga bulan lagi dengan lebih bersasar, khususnya bagi sektor pelancongan serta sektor peruncitan dengan kadar RM600 ringgit sebulan bagi pekerja bergaji RM4,000 dan ke bawah. Selain itu, had 200 pekerja bagi setiap permohonan akan ditingkatkan kepada 500 pekerja. Sebanyak RM1.5 bilion ringgit diperuntukkan dan dijangka akan membantu 70 ribu majikan dan 900 ribu pekerja.

13. Selain itu, Kerajaan telah meluluskan pengecualian bayaran levi tabung Kumpulan Wang Pembangunan Sumber Manusia (KWPSM @ HRDF) untuk tempoh selama 6 bulan berkuatkuasa 1 Januari 2021 kepada majikan di bawah sektor pelancongan dan syarikat yang terjejas akibat penularan COVID-19 ini. Majikan yang terjejas boleh mengemukakan permohonan kepada PSMB untuk dikecualikan daripada membayar levi. Inisiatif ini akan dapat membantu mengurangkan beban aliran tunai syarikat yang masih terjejas disebabkan oleh COVID-19.

14. Pada masa ini, Kerajaan melalui PERKESO membantu pekerja yang kehilangan pekerjaan melalui pemberian Elaun Mencari Pekerjaan. Elaun ini diberi selama enam bulan di mana bulan pertama layak menuntut 80 peratus gaji dan secara beransur-ansur berkurang kepada 30 peratus gaji. Sehubungan itu, bagi tahun 2021, tempoh Elaun Mencari Kerja akan dilanjutkan selama tiga bulan dan kadar layak menuntut daripada 80 peratus gaji bagi bulan pertama, 50 peratus bagi bulan kedua hingga keenam dan seterusnya 30 peratus bagi tiga bulan terakhir. Bagi tujuan ini, peruntukan sebanyak RM150 juta ringgit akan disediakan dan dijangka memanfaatkan sehingga 130 ribu orang pencari kerja.

15. Kerajaan akan sentiasa berusaha agar kadar pengangguran di Malaysia adalah terkawal dan memastikan rakyat mampu mendepani saat-saat sukar yang belum pernah dialami oleh Negara sebelum ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : YB DATIN PADUKA DR. TAN YEE KEW
[WANGSA MAJU]**

TARIKH : 9 DISEMBER 2020 (RABU)

SOALAN

**DATIN PADUKA DR. TAN YEE KEW [WANGSA MAJU] minta MENTERI
SUMBER MANUSIA menyatakan :**

- (a) apakah rasional tindakan Kementerian membenarkan PERKESO mengambil alih JobsMalaysia di saat rakyat sedang menghadapi kehilangan pekerjaan akibat COVID-19; dan
- (b) apakah nasib kakitangan JobsMalaysia akibat proses pengambil alihan ini memandangkan ramai pekerja berpengalaman dalam pelaksanaan program 'job matching'.

JAWAPAN

Tuan Yang di-Pertua,

1. JobsMalaysia berperanan sebagai Perkhidmatan Pekerjaan Awam (*Public Employment Services - PES*) untuk memberikan perkhidmatan *Job Brokerage*. *JobsMalaysia* melaksanakan pepadanan dan membantu penempatan pekerjaan bagi meningkatkan penyertaan tenaga kerja dalam pasaran buruh ke arah merealisasikan dasar pasaran buruh aktif (*Active Labour Market Policy*).

3. Susulan daripada pandemik COVID-19 yang melanda negara, Kementerian telah melaksanakan inisiatif PenjanaKerjaya di bawah Pelan Jana Semula Ekonomi Negara (PENJANA) bertujuan meransang permintaan pekerjaan di kalangan majikan dan meningkatkan peluang pekerjaan serta kebolehpasaran di kalangan pencari kerja tempatan. Kebanyakan inisiatif di bawah PENJANA adalah dilaksanakan oleh Pertubuhan Keselamatan Sosial (PERKESO) dengan menggunakan portal penyedia perkhidmatan pekerjaan, MyFutureJobs. Seperti mana JobsMalaysia, portal MyFutureJobs juga membantu majikan mengisi kekosongan jawatan, mempromosikan kekosongan jawatan secara aktif, membantu pencari kerja mendapatkan pekerjaan dan melaksanakan profiling pencari kerja dan kekosongan jawatan.

4. Mengambil kira keperluan memastikan insentif yang disediakan oleh Kerajaan disalurkan secara efisien, cepat dan mudah diakses oleh golongan sasaran, Kementerian telah mengambil langkah menumpukan pelaksanaan perkhidmatan padanan pekerjaan kepada MyFutureJobs bagi melaksanakan perkhidmatan yang bersifat setempat atau *one stop*.

5. Langkah ini diharapkan dapat meningkatkan mobilisasi tenaga kerja negara dengan memastikan penyertaan tenaga kerja secara optimum melalui penjodohan pencari kerja dan kekosongan jawatan yang lebih sistematik. Pengukuhan perkhidmatan pekerjaan di negara ini juga akan dapat memantau kekosongan jawatan di semua sektor yang sesuai diisi oleh pekerja tempatan. Pelaksanaan ini merupakan satu dasar yang akan memberi kesan positif yang signifikan secara jangka panjang kepada negara serta berupaya meningkatkan kecekapan dan keberkesanan penyampaian perkhidmatan negara.

Untuk makluman Ahli Yang Berhormat,

6. Pegawai-pegawai yang bertugas di JobsMalaysia adalah terdiri dari pegawai dari Skim Perhubungan Perusahaan di bawah Jabatan Tenaga Kerja (JTK). Secara umumnya JTK adalah jabatan yang bertanggungjawab melaksanakan penguatkuasaan undang-undang perburuhan dan perjanjian antarabangsa di Malaysia.

7. Dengan keadaan semasa di mana permohonan untuk pertambahan perjawatan baru adalah amat terhad, perjawatan pegawai Perhubungan Perusahaan di JobsMalaysia boleh diambilkira dalam melaksanakan langkah penyusunan semula organisasi bagi memperkukuh fungsi penguatkuasaan undang-undang perburuhan. Perkara ini selaras dengan penambahan bidang tugas dan skop penguatkuasaan JTK seiring pentadbiran dan penguatkuasaan undang-undang seperti berikut:

- (i) Akta Kerja 1955 (sedang dalam pindaan);
- (ii) Akta Agensi Pekerjaan Swasta 1981 (Pindaan 2017);
- (iii) Akta Penggajian Kanak-Kanak dan Orang Muda 1966 (Pindaan 2018);
- (iv) Akta Standard-Standard Minimum Perumahan dan Kemudahan Pekerja Akta 446;
- (v) Akta Umur Persaraan Minimum 2012 (Akta 753); dan
- (vi) Akta Majlis Perundingan Negara 2011 (Akta 732).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN SALAHUDDIN B. AYUB (PULAI)

TARIKH : 9 DISEMBER 2020 (RABU)

SOALAN

DATUK SERI HAJI SALAHUDDIN BIN AYUB [PULAI] minta **MENTERI DALAM NEGERI** menyatakan adakah terdapat sebarang campur tangan pegawai polis dalam sebarang siasatan terhadap salah laku polis.

JAWAPAN

Tuan Yang Di Pertua,

Pada masa ini, Jabatan Integeriti dan Pematuhan Standard (JIPS) adalah sebuah Jabatan di bawah PDRM yang bertanggungjawab dalam semua urusan salah laku anggota dan pegawai PDRM. Unit Kajian Kes dan Siasatan akan menjalankan penyiasatan dan menyediakan laporan lengkap terhadap sesuatu kes yang dilaporkan samada pegawai melanggar atau tidak peraturan yang telah ditetapkan di dalam Peraturan-Peraturan Pegawai Awam (Kelakuan dan Tatatertib) 1993.

Pegawai yang bertanggungjawab dalam menguruskan kes-kes tindakan tatatertib, kajian kes dan siasatan telah menandatangani Akta Rahsia Rasmi 1972. Oleh yang demikian segala tindakan dan urusan yang dijalankan adalah sulit. Tiada sebarang campur tangan pegawai polis dalam sesuatu kes memandangkan kes-kes yang disiasat akan dibentangkan di dalam mesyuarat Lembaga Tatatertib.

Jika pegawai atau Lembaga tatatertib berpendapat bahawa perkara itu patut dikenakan hukuman yang tidak termasuk dalam bidang kuasanya untuk dikenakan, pegawai atau Lembaga Tatatertib hendaklah merujuk perkara tersebut kepada Suruhanjaya Pasukan Polis. Kuorum bagi sesuatu Mesyuarat Lembaga Tatatertib hendaklah terdiri daripada pengerusi dan dua orang anggota yang lain.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TEH KOK LIM [TAIPING]

TARIKH : 9 DISEMBER 2020 (RABU)

SOALAN

TEH KOK LIM [TAIPING] minta **MENTERI SUMBER MANUSIA** menyatakan usaha/ rancangan Kementerian dalam menangani masalah pengangguran rakyat Malaysia khasnya golongan muda yang semakin meningkat dan tindakan yang telah diambil untuk mengawal bilangan pekerja asing termasuk mereka yang tidak berpermit.

JAWAPAN

Tuan Yang di-Pertua,

1. Jabatan Perangkaan Malaysia (DOSM) menganggarkan julat maksimum kadar pengangguran secara keseluruhannya adalah dalam lingkungan 3.5 peratus hingga 5.5 peratus pada tahun ini susulan daripada pandemik Covid-19.
2. Berdasarkan data terkini Laporan Tenaga Buruh oleh DOSM, kadar pengangguran belia pada suku tahun pertama 2020 ialah 11.0 peratus iaitu seramai 291.4 ribu orang belia. Manakala kadar pengangguran belia bagi suku tahun kedua pula ialah 12.5 peratus iaitu 326.7 ribu orang belia menganggur. Situasi ini berlaku susulan daripada pandemik Covid-19 yang menunjukkan kadar pengangguran belia meningkat sebanyak 1.5 mata peratus antara suku tahun pertama dan kedua tahun 2020.
3. Bagi mengawal bilangan pekerja asing termasuk mereka yang tidak berpermit, Kerajaan mengamalkan dasar memberikan keutamaan penggajian kepada warga tempatan. Semua majikan yang berhasrat untuk menggajikan pekerja asing melalui program pengambilan semula (*re-hiring*) dan juga permohonan pengambilan pegawai dagang (*expatriate*) diwajibkan terlebih dahulu mengiklankan kekosongan jawatan tersebut di portal pekerjaan nasional, MYFutureJobs, berkuatkuasa 1 November 2020. Pengiklanan kekosongan jawatan di MYFutureJobs hendaklah tidak kurang daripada 14 hari bagi program *re-hiring* pekerja asing (yang sedia ada dalam negara) dan 30 hari bagi permohonan pegawai dagang. Hanya jawatan yang tidak dapat diisi oleh pekerja tempatan sahaja dibenarkan untuk menggajikan warga asing.
4. Pengambilan Pegawai Dagang (Ekspatriat) hanya akan dilakukan apabila kemahiran atau kepakaran yang diperlukan tidak dimiliki oleh warga tempatan atau bilangannya sangat terhad untuk memenuhi kekosongan jawatan yang ditawarkan. Permohonan bagi jawatan ekspatriat ini juga perlu

dikemukakan kepada pihak-pihak berkuasa berkenaan yang ditentukan mengikut jenis-jenis perniagaan dan industri.

5. Bagi menambahbaik kawalan penggajian ekspatriat, kerjasama dengan Kementerian Dalam Negeri, jabatan dan agensi terlibat akan dipertingkatkan dengan memperkenalkan langkah-langkah yang lebih berkesan seperti pelaksanaan integrasi sistem dengan pelbagai agensi di bawah satu platform.

Untuk makluman Ahli Yang Berhormat,

6. Kerajaan telah menjangkakan impak Perintah Kawalan Pergerakan (PKP) terhadap ekonomi dan pekerjaan dari awal lagi, dan telah memperkenalkan beberapa inisiatif untuk membantu mengurangkan beban industri dan menjamin kelangsungan pekerjaan bagi tenaga kerja Malaysia seperti Pakej Rangsangan Ekonomi dan Pelan Jana Ekonomi Negara (PENJANA).

7. Antara inisiatif yang diperkenalkan adalah terdiri daripada **lima (5) inisiatif PENJANA berkaitan sumber manusia**. Pertama, **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 dan ke bawah. Kedua, **Menaik Taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja. Ketiga, **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan. Keempat, **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran dan kelima, **Perlindungan Sosial dan Latihan bagi Pekerja Ekonomi Gig** bagi menjamin keselamatan sosial dan kebajikan golongan pekerja ekonomi gig.

8. Program Subsidi Upah (PSU 1.0) dan pelanjutan Program Subsidi Upah (PSU) 2.0 membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program ini melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,950 syarikat dan 2.73 juta pekerja telah menerima manfaat ini. Sehingga 27 November 2020, PERKESO telah menyalurkan bantuan kepada 77,882 majikan dan 782, 904 pekerja melalui program PSU 2.0.

9. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu seramai 90,930 ribu pekerja sehingga 27 November 2020.

10. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling* dan *reskilling*) iaitu *Place and Train*, *B40 Development*, *SME Development*, *Industry Revolution 4.0* dan *Gerak Insan Gemilang (GIG)*.

11. Dalam usaha kerajaan untuk memperkasakan rakyat, Kementerian melalui Pembangunan Sumber Manusia Berhad (PSMB) telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak Dua (2) Billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah Dua Ratus Ribu (200 ribu) belia dan golongan penganggur.

12. PENJANA *Upskilling & Reskilling* akan membantu golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah RM500 juta peruntukan telah disalurkan dan seramai 102,000 pelatih telah diluluskan untuk mengikuti pelbagai program dibawah PENJANA *Upskilling & Reskilling*. Langkah ini dijangka akan terus membantu mengurangkan kadar pengangguran Negara ke aras yang lebih stabil.

13. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

14. Melalui Belanjawan 2021 yang diumumkan baru-baru ini, Kerajaan akan meneruskan inisiatif pengambilan pekerja di bawah PERKESO yang kini dikenali sebagai PenjanaKerjaya dengan peruntukan sebanyak RM2 bilion ringgit. Inisiatif ini dijangka dapat membuka peluang pekerjaan kepada 250 ribu pencari kerja.

15. Kerajaan juga akan melanjutkan pelaksanaan Program Subsidi Upah selama tiga bulan lagi dengan lebih bersasar, khususnya bagi sektor pelancongan serta sektor peruncitan dengan kadar RM600 ringgit sebulan bagi pekerja bergaji RM4,000 dan ke bawah. Selain itu, had 200 pekerja bagi setiap permohonan akan ditingkatkan kepada 500 pekerja. Sebanyak RM1.5 bilion ringgit diperuntukkan dan dijangka akan membantu 70 ribu majikan dan 900 ribu pekerja.

16. Selain itu, Kerajaan telah meluluskan pengecualian bayaran levi tabung Kumpulan Wang Pembangunan Sumber Manusia (KWPSM @ HRDF) untuk tempoh selama 6 bulan berkuatkuasa 1 Januari 2021 kepada majikan di bawah sektor pelancongan dan syarikat yang terjejas akibat

penularan COVID-19 ini. Majikan yang terjejas boleh mengemukakan permohonan kepada PSMB untuk dikecualikan daripada membayar levi. Inisiatif ini akan dapat membantu mengurangkan beban aliran tunai syarikat yang masih terjejas disebabkan oleh COVID-19.

17. Pada masa ini, Kerajaan melalui PERKESO membantu pekerja yang kehilangan pekerjaan melalui pemberian Elaun Mencari Pekerjaan. Elaun ini diberi selama enam bulan di mana bulan pertama layak menuntut 80 peratus gaji dan secara beransur-ansur berkurang kepada 30 peratus gaji. Sehubungan itu, bagi tahun 2021, tempoh Elaun Mencari Kerja akan dilanjutkan selama tiga bulan dan kadar layak menuntut daripada 80 peratus gaji bagi bulan pertama, 50 peratus bagi bulan kedua hingga keenam dan seterusnya 30 peratus bagi tiga bulan terakhir. Bagi tujuan ini, peruntukan sebanyak RM150 juta ringgit akan disediakan dan dijangka memanfaatkan sehingga 130 ribu orang pencari kerja.

18. Kerajaan akan sentiasa berusaha agar kadar pengangguran di Malaysia adalah terkawal dan memastikan rakyat mampu mendepani saat-saat sukar yang belum pernah dialami oleh Negara sebelum ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN RAMKARPAL SINGH A/L KARPAL
SINGH (BUKIT GELUGOR)**

TARIKH : 9 DISEMBER 2020 (RABU)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI DALAM NEGERI** menyatakan status siasatan polis terhadap Menteri Perusahaan Perladangan dan Komoditi berkenaan tuduhan terhadap beliau kerana melanggar peraturan kuarantin setelah pulang dari luar negara.

JAWAPAN

Tuan Yang Di Pertua,

Untuk makluman, pihak PDRM telah menerima sebanyak 27 laporan polis ke atas YB Menteri Perusahaan Perladangan dan Komoditi yang didakwa tidak menjalani kuarantin selepas balik dari luar negara. Siasatan telah dijalankan bersabit Sri Petaling Repot 5634/2020 bertarikh 19 Ogos 2020 di bawah Seksyen 22 (b) Akta Pencegahan dan Pengawalan Penyakit Berjangkit 1988 (Akta 342).

Kertas siasatan telah dikemukakan kepada Pejabat Peguam Negara yang mempunyai bidang kuasa mutlak untuk keputusan selanjutnya. Untuk makluman Ahli Yang Berhormat, YB Menteri berkenaan juga telah membayar sejumlah kompoun yang dikenakan ke atas beliau.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN

**DARIPADA : YB TUAN SHAHARIZUKIRNAIN BIN ABD.
KADIR [SETIU]**

TARIKH : 9 DISEMBER 2020 (RABU)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI SUMBER MANUSIA** menyatakan berapakah majikan yang telah dapat bantuan Program Subsidi Upah (PSU) selepas pendaftaran majikan dilanjutkan sehingga **31 Ogos 2020** mengikut pecahan negeri berbanding dengan tarikh tutup pendaftaran sebelum **1 April 2020**.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kerajaan amat prihatin dengan nasib rakyat dan juga berusaha untuk memastikan keadaan ekonomi negara dapat dipulihkan.
2. Program Subsidi Upah yang berkuatkuasa pada 1 April 2020 telah tamat pada 30 September 2020. Pada 1 April 2020 sebanyak **231,815** permohonan majikan telah diterima dan mendapat manfaat dalam program ini. Manakala sehingga 30 September 2020 sebanyak **331,950** permohonan diterima dan memanfaatkan lebih **2.7 juta** pekerja.
3. Seterusnya, pada 23 September 2020 YAB Perdana Menteri telah mengumumkan bahawa Program Subsidi Upah 2.0 berkuatkuasa pada 1 Oktober 2020 untuk tempoh tiga (3) bulan. Sehingga 27 November 2020, **77,882** majikan telah mengemukakan permohonan untuk Program Subsidi Upah 2.0 yang melibatkan **782,904** pekerja.

4. Bantuan Program Subsidi Upah kepada majikan berdasarkan pecahan negeri adalah seperti berikut:

- i. Pertamanya, Selangor **83,945** permohonan majikan;
- ii. Kedua, Johor **46,322** permohonan majikan;
- iii. Ketiga, Kuala Lumpur **40,050** permohonan majikan;
- iv. Keempat, Sarawak **29,785** permohonan majikan;
- v. Kelima, Pulau Pinang **24,821** permohonan majikan;
- vi. Keenam, Perak **23,636** permohonan majikan;
- vii. Ketujuh, Sabah **19,517** permohonan majikan;
- viii. Kelapan, Kedah **14,097** permohonan majikan;
- ix. Kesembilan, Pahang **12,049** permohonan majikan;
- x. Kesepuluh, Negeri Sembilan **10,336** permohonan majikan;
- xi. Kesebelas, Melaka **10,570** permohonan majikan;
- xii. Keduabelas, Terengganu **7,734** permohonan majikan;
- xiii. Ketigabelas, Kelantan **5,828** permohonan majikan;
- xiv. Keempatbelas, Labuan **1,398** permohonan majikan;
- xv. Kelimabelas, Perlis **1,422** permohonan majikan;
- xvi. Keenambelas, Putrajaya **421** permohonan majikan

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG KAH WOH
[IPOH TIMUR]**

TARIKH : 9 DISEMBER 2020 (RABU)

SOALAN

TUAN WONG KAH WOH [IPOH TIMUR] minta **MENTERI KESIHATAN** menyatakan menyenaraikan dengan terperinci kapasiti Klinik Kesihatan Station 18, Ipoh dan Klinik Ibu dan Anak Pengkalan Pegoh. Nyatakan sama ada Kementerian mempunyai rancangan untuk menaiktarafkan kedua-dua klinik tersebut memandangkan populasi kawasan setempat semakin bertambah.

JAWAPAN

Tuan Yang di-Pertua,

1. Klinik Komuniti Station (KKom) 18 merupakan sebuah fasiliti yang beroperasi secara sewaan sejak ianya dibuka pada tahun 2012. Purata kedatangan sehari adalah sejumlah **145 orang bagi tahun 2019** dan antara fasiliti Klinik Komuniti berkedatangan tinggi di Negeri Perak.
2. Fasiliti ini menyediakan perkhidmatan **rawatan pesakit luar** termasuk **rawatan penyakit kronik** kepada penduduk di Pengkalan Pegoh dengan liputan populasi berjumlah **50,000 orang penduduk**. Manakala bagi perkhidmatan kesihatan ibu dan anak (MCH) disediakan oleh Klinik Kesihatan Ibu dan Anak (KKIA) Pengkalan Pegoh yang terletak 1.3 Km dari lokasi KKom Station 18 ini. Purata kedatangan bagi KKIA Pengkalan Pegoh adalah seramai **182 sehari pada tahun 2019**.

3. KKIA Pengkalan Pegoh beroperasi di rumah bidan lama bersaiz 214.7 meter persegi selepas naik taraf Klinik Desa kepada KKIA pada tahun 2012 manakala KKom Station 18 beroperasi di 1 lot rumah kedai bersaiz 108 meter persegi.

4. Berdasarkan jumlah kedatangan harian KKom Station 18 dan KKIA Pengkalan Pegoh yang tinggi dan melebihi kapasiti fizikal kedua-dua fasiliti tersebut, Kementerian telah mencadangkan kepada Jabatan Kesihatan Negeri Perak agar **mempertimbangkan perpindahan** serta **naik taraf kedua-dua fasilti ini kepada Klinik Kesihatan pada 2019.**

5. KKM sedar akan jumlah kedatangan pesakit yang tinggi dan sedang berusaha untuk mendapatkan **lot rumah kedai bersesuaian** untuk menampung kedatangan Pesakit Luar dan Kesihatan Ibu dan Anak yang hampir mencecah 300 kedatangan sehari. Perkhidmatan kesihatan di KKIA Pegoh dan Klinik Komuniti Station 18 dirancang untuk **disatukan untuk menjadi satu Klinik Kesihatan** dalam usaha untuk menyampaikan satu perkhidmatan yang komprehesif di bawah satu bumbung kepada penduduk di kawasan tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DR. KELVIN YII LEE WUEN [BANDAR KUCHING]

TARIKH : 9 DISEMBER 2020 (RABU)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan pelan Kementerian untuk mewajibkan suntikan vaksin pneumococcal, kaedah dan sasaran yang akan menerima vaksin tersebut. Adakah tender telah dilakukan, syarikat apa yang telah mendapat tender tersebut dan apakah jenis vaksin yang diperolehi, sama ada ia adalah PCV13 atau PCV10.

JAWAPAN

Tuan Yang di-Pertua,

1. Program Imunisasi Pneumokokal yang dilaksanakan di bawah Program Imunisasi Kebangsaan untuk Kanak-Kanak melibatkan kira-kira **500,000 kanak-kanak setiap tahun** telah bermula pada **1 Disember 2020 di semua Klinik Kesihatan Kementerian Kesihatan di seluruh negara**.
2. Kanak-kanak warganegara yang lahir pada **1 Januari 2020 dan seterusnya** adalah **layak** untuk menerima suntikan vaksin pneumokokal secara percuma di klinik kesihatan KKM.
3. Kanak-kanak bukan warganegara yang lahir pada 1 Januari 2020 dan seterusnya juga layak untuk menerima suntikan vaksin tersebut di klinik kesihatan KKM, namun **tertakluk kepada caj di bawah Perintah Fi Perubatan (Kos Perkhidmatan) 2014**.

4. Setiap kanak-kanak akan menerima **tiga (3) dos suntikan vaksin pneumokokal** konjugat (*pneumococcal conjugate vaccine*, PCV), iaitu:
- a. Dua (2) dos primer pada umur 4 bulan dan 6 bulan; diikuti dengan
 - b. Satu (1) dos penggalak (*booster*) pada umur 15 bulan.
5. Bagi kanak-kanak yang lahir pada 1 Januari 2020 dan seterusnya, namun telah melepasi usia 4 bulan, penjadualan semula pemberian suntikan vaksin pneumokokal akan dibuat mengikut kesesuaian umur.
6. Memandangkan situasi pandemik COVID-19 yang masih belum pulih, pelaksanaan pemberian suntikan vaksin pneumokokal akan dilaksanakan di klinik kesihatan KKM secara temujanji, bagi memastikan kepatuhan kepada norma baharu dalam usaha mencegah penularan penyakit COVID-19.
7. Perolehan vaksin pneumokokal telah dibuat **secara tender terbuka**, dengan mengikut segala tatacara perolehan Kerajaan. Kontrak pembekalan vaksin pneumokokal telah ditandatangani dengan **Syarikat MS Ally Sdn. Bhd.**, dengan tempoh kontrak **selama dua (2) tahun**.
8. Vaksin yang akan digunakan di bawah Program Imunisasi Kebangsaan bagi tempoh dua (2) tahun pertama pelaksanaan adalah vaksin **PCV-10 (Synflorix keluaran Syarikat GSK)**, yang melindungi terhadap sepuluh (10) *serotype* bakteria *Streptococcus pneumoniae* atau pneumokokus, iaitu *serotype* iaitu 1, 4, 5, 6B, 7F, 9V, 14, 18C, 19F dan 23F. Vaksin ini juga memberi perlindungan *cross-reactivity* terhadap *serotype* 19A.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
(WANGSA MAJU)**

TARIKH SOALAN : 9 DISEMBER 2020 (RABU)

SOALAN

DATIN PADUKA DR. TAN YEE KEW (WANGSA MAJU) minta **MENTERI ALAM SEKITAR DAN AIR** menyatakan apakah punca-punca Kementerian gagal membekal air yang bersih kepada pengguna tanpa gangguan dan apakah langkah pencegahan dan penguatkuasaan Kementerian bagi memastikan tidak berulang gangguan bekalan air.

JAWAPAN

Tuan Yang Di-Pertua,

1. Terlebih dahulu saya ingin mengambil kesempatan ini untuk menjelaskan bahawa tanggungjawab penyediaan bekalan air terletak di bawah tanggungjawab operator milik penuh Kerajaan Negeri masing-masing. Tanggungjawab ini sesuai dengan peranan setiap Kerajaan Negeri di bawah Perlembagaan Malaysia yang mempunyai kuasa ke atas semua sumber dan punca air seperti kawasan hutan tadahan air, sungai, tasik dan air bawah tanah. Contohnya Pengurusan Air Selangor Sdn. Bhd. atau Air Selangor (dahulu dikenali sebagai Syarikat Bekalan Air Selangor atau SYABAS) ialah sebuah operator milik Kerajaan Negeri Selangor yang bertanggungjawab menyediakan perkhidmatan pembekalan air di Negeri Selangor, Wilayah Persekutuan Kuala Lumpur dan Putrajaya.

2. Kuasa Kerajaan Persekutuan melalui jadual Sembilan Perlembagaan Malaysia yang diperincikan lagi melalui Akta Industri Perkhidmatan Air

2006 (Akta 655) dan Akta Suruhanjaya Perkhidmatan Air Negara 2006 (Akta 654) ialah untuk mengawal selia pembekalan air terawat kepada pengguna di Semenanjung Malaysia dan Wilayah-wilayah Persekutuan. Kementerian Alam Sekitar dan Air (KASA) melalui Suruhanjaya Perkhidmatan Air Negara (SPAN) sebagai badan kawal selia sektor bekalan air negara turut meletakkan obligasi ke atas operator bekalan air untuk meningkatkan kecekapan operasi dan keberkesanan kewangan dalam penyediaan bekalan air kepada pengguna. Dalam hal ini, operator air dikawal selia termasuk dari aspek seperti kuantiti dan kualiti bekalan, NRW, kesinambungan bekalan air, liputan bekalan air, tekanan air dan kompetensi.

Tuan Yang Dipertua,

3. Usaha memerangi jenayah alam sekitar, ianya memerlukan kerjasama semua pihak – kerajaan, badan bukan kerajaan, pihak swasta, badan korporat, orang ramai dan sebagainya. Dalam konteks pencemaran sumber air yang berlaku di Selangor, KASA telah menggaris 4 pendekatan jangka panjang iaitu:

(i) kawal selia dan penguatkuasaan yang lebih inovatif melibatkan semua pihak dan agensi menggunakan pendekatan punitif dan preventif.

(a) Bagi menyelaras tindakan lebih berkesan ke atas penjenayah alam sekitar termasuk pencemaran sumber air, KASA telah menubuhkan Unit Cegah Jenayah Alam Sekitar (UCJAS) yang mula beroperasi secara pentadbiran pada 1 Oktober 2020. Buat sementara waktu, KASA mengguna pakai perjawatan dan peruntukan sedia ada dengan kerjasama PDRM. Menurut anggaran KASA, sejumlah 50 pegawai tambahan adalah diperlukan yang akan ditempatkan di setiap negeri bagi mengagotai UCJAS ini. Secara keseluruhan, UCJAS akan melibatkan penempatan pegawai penguat kuasa daripada JAS, SPAN dan Jabatan Biokeselamatan. Unit ini akan bekerjasama dengan PDRM daripada aspek kepakaran siasatan, risikan dan forensik.

(b) Manakala pendekatan preventif yang sedang dilaksanakan ialah **Program Denai Sungai Kebangsaan (DSK)** sebagai platform penglibatan masyarakat massa untuk bersama-sama melestarikan sumber air. Untuk tahun ini, kita telah memulakan inisiatif ini dengan membuat kerjasama pelbagai agensi dan NGO mengguna pakai kemudahan sedia ada berdasarkan kepada projek pembinaan rancangan tebatan banjir (RTB). Berdasarkan kepada pelan strategik dan pelestarian KASA menasaskan pembinaan 1,000 km denai dibina menjelang tahun 2023 dan 10,000 km pada tahun 2030. Kewujudan denai ini bakal menarik kehadiran orang ramai di kawasan tersebut dan seterusnya mengurangkan risiko sungai dan tebing sungai daripada dijadikan tempat pembuangan sisa sama ada sisa pepejal, buangan terjadual, efluen industri dan sebagainya oleh mereka yang tidak bertanggung jawab. Melalui program DSK ini juga, masyarakat akan lebih menghargai sungai dan alam sekitar serta membolehkan aduan pencemaran dilaporkan untuk tindakan segera pihak berkuasa. Di samping itu, DSK ini juga berpotensi untuk menyumbang kepada eko-pelancongan setempat. Projek rintis DSK telah disempurnakan di Sungai Pengkalan Datu, Kubang Kerian, Kelantan. Denai sepanjang hampir satu kilometer ini bermula di kawasan belakang Hospital Universiti Sains Malaysia (HUSM) dan melalui sekitar kawasan hutan bakau di sekitar Min House Camp, Kubang Kerian.

(ii) Tindakan tegas dan hukuman lebih berat kepada penjenayah alam sekitar.

(a) Peruntukan sedia ada di bawah **Akta Kualiti Alam Sekeliling 1974** dan **Akta Industri Perkhidmatan Air 2006** (Akta 655) akan dipinda. Cadangan pindaan Akta 655 telah disediakan dan sedang dalam proses untuk mendapatkan kelulusan dasar Jemaah Menteri pada Disember 2020. Pindaan ini dijangka dapat dibentangkan pada tahun 2021 dalam Mesyuarat Kedua, Penggal

Keempat, Sidang Parlimen Keempat Belas bagi mengenakan denda dan hukuman yang lebih berat ke atas penjenayah alam sekitar. Hukuman denda bagi kesalahan mencemar air di bawah Seksyen 121 Akta Industri Perkhidmatan Air 2006 akan dicadangkan untuk ditingkatkan daripada **RM100,000 kepada RM10 juta** manakala hukuman penjara dinaikkan daripada **1 tahun kepada 15 tahun** atau kedua-duanya sekali. Jabatan Alam Sekitar sedang dalam proses meminda Akta Kualiti Alam Sekeliling 1974. Pindaan yang dilakukan melibatkan hukuman dan penalti yang lebih tinggi daripada nilai sedia ada. Selain daripada itu, nilai kompaun bagi kesalahan-kesalahan yang dilakukan di bawah Akta ini juga akan ditingkatkan.

- (b) Selain itu, pindaan juga akan dibuat bagi memperuntukkan kuasa kepada pegawai polis untuk menjalankan kuasa penguatkuasaan di bawah kedua-dua Akta tersebut.

(iii) Mempertingkatkan rizab simpanan bagi jaminan bekalan air berterusan

Antara langkah-langkah bagi memastikan pengguna mendapat bekalan air secara berterusan termasuk meningkatkan **rizab simpanan** (*reserve margin*) air terawat sehingga 15-20% dengan:

- (a) mempertingkatkan **kapasiti dan kesediaan air terawat** melalui kerja naik taraf loji rawatan air (LRA) sedia ada dan pembinaan LRA baru;
- (b) meningkatkan **kapasiti tangki simpanan** air terawat;
- (c) mengurangkan NRW ke paras 25% menjelang tahun 2030,
- (d) mengurangkan **penggunaan air** 230 liter sehari seorang kepada 180 liter menjelang 2025; dan
- (e) penggunaan **alat cekap air**.

(iv) Meningkatkan kapasiti takungan sumber air mentah.

- (a) Risiko gangguan air di Lembah Kelang baru-baru ini boleh diminimumkan sekiranya Selangor mempunyai sumber air alternatif yang digunakan tatkala sumber air utama iaitu Sungai Selangor dan Sungai Semenyih tercemar. Sehubungan dengan ini, KASA telah mengemukakan cadangan kepada pihak EPU, JPM untuk melaksanakan **projek takungan air pinggiran sungai (TAPS) dalam Rancangan Malaysia Kedua Belas (RMKe-12)** sebagai sumber air alternatif bagi meminimumkan gangguan bekalan air akibat insiden pencemaran air dan cuaca kering. TAPS ini juga akan berfungsi sebagai mekanisma kawalan banjir. Di bawah RMKe-11, empat (4) projek TAPS telah diluluskan iaitu TAPS Jernih, TAPS Melaka, TAPS Sungai Johor dan TAPS Linggi dengan peruntukan keseluruhan berjumlah RM1.4 bilion.
- (b) Dalam pada itu, KASA juga akan memperluaskan penggunaan **air pulih guna** atau dengan izin, *reclamation water* yang dihasilkan oleh loji rawatan kumbahan khasnya untuk kegunaan industri. Bekalan air tambahan ini dapat mengurangkan kebergantungan kepada sumber air mentah. KASA telah menetapkan sasaran untuk menghasilkan **1,500 juta liter sehari (JLH)** air pulih guna dari loji rawatan kumbahan menjelang tahun 2030.

Sekian. Terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 9 DISEMBER 2020 (RABU)

SOALAN

Minta **MENTERI PENGANGKUTAN** menyatakan jumlah permohonan penggunaan cermin gelap yang diluluskan pada tahun 2018, 2019 dan 2020 serta jumlah fi yang telah dikutip sebagai hasil Kerajaan.

JAWAPAN

Yang di-Pertua,

1. Untuk makluman Yang Berhormat, Kementerian Pengangkutan Malaysia (MOT) melalui Jabatan Pengangkutan Jalan Malaysia (JPJ) telah meluluskan sebanyak 3,372 permohonan penggunaan cermin gelap dari tahun 2018 sehingga November 2020.
2. Pecahan kelulusan mengikut tahun adalah seperti berikut, sebanyak 1,604 kelulusan pada tahun 2018, 589 kelulusan pada tahun 2019 dan 632 kelulusan sehingga bulan November tahun 2020.
3. Fi bagi kelulusan penggunaan cermin gelap telah diperkenalkan mulai Jun 2019 dan fi ini hanya dikenakan bagi permohonan atas faktor keselamatan dan tiada fi dikenakan bagi permohonan atas faktor kesihatan.
4. Jumlah fi yang telah dikutip pada tahun 2019 adalah sebanyak RM 1,319,390 dan dari Januari 2020 sehingga November 2020 adalah sebanyak RM 1,260,150.00. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN MUHAMMAD BAKHTIAR BIN WAN
CHIK (BALIK PULAU)**

TARIKH : 9 DISEMBER 2020 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI DALAM NEGERI** menyatakan jelaskan sikap ketidakpedulian (*inaction*) apabila wabak COVID-19 merebak dengan pantas dalam penjara-penjara di bawah seliaan Kementerian dan mengharapkan bantuan orang ramai membantu menyumbang barangan keperluan.

JAWAPAN

Tuan Yang Di Pertua,

Dimaklumkan, kenyataan yang menuduh bahawa Kementerian Dalam Negeri (KDN) dan Jabatan Penjara Malaysia mengambil sikap ketidakpedulian adalah tidak berasas sama sekali. Begitu juga tohmahan bahawa Kementerian dan Jabatan Penjara hanya mengharapkan bantuan orang ramai membantu menyumbang barangan keperluan juga tidak tepat.

Jabatan Penjara dengan sokongan padu dari KDN telah mengambil tindakan segera bagi menangani isu COVID-19. Begitu juga perkembangan yang berlaku turut dipantau pada setiap masa secara dekat dan berterusan. Di antara tindakan yang telah diambil secara bersama yang melibatkan KDN adalah seperti berikut:

- i. Mewujudkan 11 penjara sementara sebagai Pusat Transit Penerimaan untuk banduan serta meluluskan peruntukan berjumlah RM4,410,685.00 bagi membolehkan penjara sementara beroperasi dengan sempurna;
- ii. Meluluskan sejumlah peruntukan darurat yang tinggi bagi keperluan Jabatan Penjara Malaysia mendapatkan keperluan tambahan yang melibatkan pelbagai peralatan termasuklah peralatan *PPE*, peralatan harian banduan, penyediaan makanan bermasak, penyewaan kenderaan dan lain-lain;
- iii. Menilai dan merancang bersama Jabatan Penjara Malaysia bagi penggunaan PLKN sebagai *admission prison* untuk menempatkan banduan kategori keselamatan minima bagi mengurangkan kesesakan dan seterusnya kebolehtangkitan COVID-19;
- iv. Melaksanakan pindaan Peraturan 111 (1) Peraturan-Peraturan Penjara 2000 untuk mempercepatkan Jabatan Penjara Malaysia melaksanakan pembebasan banduan secara lesen bagi mengurangkan lagi kadar kesesakan;

SOALAN NO : 37

- v. Meluluskan rancangan mewujudkan pusat-pusat transit di penjara;
- vi. Menilai SOP yang digunakan oleh Jabatan Penjara bagi melihat keberkesanannya dalam mencegah COVID-19 termasuklah dalam aspek yang melibatkan kebajikan;
- vii. Mengadakan perbincangan dan penilaian secara berterusan bersama Jabatan Penjara Malaysia berhubung langkah dan keperluan Jabatan menangani isu ini melalui *Prison COVID-19 Task Force* di peringkat Kementerian; dan
- viii. Jabatan Penjara Malaysia memberikan jaminan bahawa akan terus mengambil berat dan prihatin terhadap hal ehwal kebajikan warga Jabatan. Bagi maksud ini bantuan kewangan kepada penjara serta anggota yang terlibat turut disumbangkan melalui Tabung COVID-19 dan Persatuan Pegawai Penjara.

Kerjasama diantara KDN dan Jabatan Penjara Malaysia telah dapat menangani isu-isu berkaitan COVID-19 dengan berkesan dan efektif sehingga Perintah Kawalan Pergerakan Diperketatkan (PKPD) keatas beberapa penjara telah dimansuhkan.

Walau bagaimanapun, terdapat beberapa Badan Bukan Kerajaan (NGO) dan orang perseorangan yang amat prihatin dengan situasi semasa di penjara telah menghulurkan bantuan seperti peralatan PPE dan keperluan harian untuk anggota penjara dan banduan.

Jabatan Penjara Malaysia melalui KDN ingin menjelaskan bahawa Jabatan tidak pernah memberikan sebarang kebenaran kepada mana-mana pihak termasuk pertubuhan dan orang perseorangan untuk membuat kutipan amal bagi tujuan COVID-19 untuk mana-mana institusi penjara. Jabatan Penjara Malaysia amat berterima kasih di atas bantuan yang diterima dan sokongan yang diberikan tetapi Jabatan Penjara Malaysia berharap agar isu ini tidak dipolitikkan bagi kepentingan mana-mana pihak.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 9 DISEMBER 2020 (RABU)

SOALAN

TUAN AHMAD BIN HASSAN [PAPAR] minta **MENTERI KESIHATAN** menyatakan jumlah kakitangan barisan hadapan sektor kesihatan di Sabah yang termasuk dalam 2,070 kakitangan KKM yang dilanjutkan kontrak perkhidmatan sehingga 6 bulan, dan apakah bentuk sokongan tambahan yang disediakan oleh Kementerian bagi membela kebajikan mereka, terutamanya yang terlibat secara langsung dalam pengurusan rawatan pesakit-pesakit COVID-19.

JAWAPAN

Tuan Yang di-Pertua,

1. Sehingga 31 Oktober 2020, jumlah kakitangan Kementerian Kesihatan Malaysia (KKM) yang berkhidmat di Sabah adalah seramai 30,730 orang, merangkumi 27,678 lantikan tetap dan 3,052 lantikan kontrak. Pecahan mengikut skim-skim utama adalah seperti berikut:

- (a) Pegawai Perubatan seramai 2,661 tetap dan 712 kontrak;
- (b) Pegawai Pergigian seramai 300 tetap dan 186 kontrak;
- (c) Pegawai Farmasi seramai 666 tetap dan 212 kontrak;
- (d) Jururawat seramai 7,555 tetap dan 503 kontrak;
- (e) Jururawat Masyarakat seramai 3,588 tetap;
- (f) Penolong Pegawai Perubatan seramai 1,684 tetap dan 634 kontrak;
- (g) Juruteknologi Makmal Perubatan seramai 530 tetap dan 31 kontrak; dan
- (h) Penolong Pegawai Kesihatan Persekitaran seramai 723 tetap dan 90 kontrak.

2. Kerajaan bersetuju meluluskan penyambungan kontrak secara *one-off* enam (6) bulan lagi kepada sejumlah 2,070 Pegawai Perubatan, Pegawai Pergigian dan Pegawai Farmasi. Daripada jumlah tersebut, seramai 73 pegawai merangkumi seorang Pegawai Perubatan, 22 Pegawai Pergigian dan 50 Pegawai Farmasi kini berkhidmat di Sabah.

3. Bagi menampung keperluan perkhidmatan dalam menangani penularan wabak COVID-19 di Sabah, KKM juga telah melaksanakan mobilisasi petugas kesihatan daripada seluruh negara ke Sabah. Secara keseluruhannya sehingga 1 Disember 2020, sejumlah 1,806 petugas kesihatan telah dimobilisasikan untuk membantu usaha saringan di lapangan dan juga rawatan perubatan.

Tuan Yang di-Pertua,

4. KKM sentiasa menitikberatkan aspek keselamatan dan perlindungan kepada petugas kesihatan dalam penyampaian perkhidmatan kesihatan. KKM juga menyediakan garis panduan dan

kawalan dalaman bagi langkah-langkah pencegahan dan kawalan infeksi di fasiliti KKM seluruh negara. Sebagai contoh KKM menyediakan kelengkapan pelindung diri (PPE) yang bersesuaian seperti penutup mulut dan hidung (mask) N95, alat pelindung mata, *fluid-repellant long-sleeve gown* (dengan izin) dan sarung tangan semasa menguruskan pesakit COVID-19.

5. Terdapat pelbagai kemudahan lain yang disediakan untuk petugas kesihatan berdasarkan peraturan semasa serta tertakluk kepada budi bicara Ketua Jabatan. Sebagai contoh, mereka boleh dipertimbangkan untuk diberikan Cuti Rehat atau melaksanakan penggiliran tugas serta bekerja dari rumah untuk tempoh tertentu bagi tujuan berehat serta memulihkan kecekapan. Cuti Gantian juga boleh diberikan kepada pegawai yang telah diarahkan untuk bekerja lebih masa tetapi tidak berkecukupan mendapat bayaran bekerja lebih masa atau sebarang bayaran khas lain.

6. Selain itu, KKM turut menyediakan perkhidmatan kesihatan mental dan sokongan psikososial kepada petugas barisan hadapan yang memerlukan. Ini termasuk talian bantuan sokongan psikososial khas untuk petugas di negeri Sabah.

7. Selain itu, seperti mana semua sedia maklum, Kerajaan turut memperuntukkan Elaun Khas COVID-19 kepada petugas barisan hadapan. Sehingga 30 November 2020, jumlah bayaran yang telah dibuat kepada petugas barisan hadapan KKM adalah sebanyak RM348 juta.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 9 DISEMBER 2020 (RABU)

SOALAN

PUAN HAJAH FUZIAH BINTI SALLEH [KUANTAN] minta **MENTERI KESIHATAN** menyatakan apakah langkah-langkah yang telah diambil oleh Kementerian Kesihatan untuk meningkatkan penyertaan perokok yang ingin berhenti merokok ke dalam program berhenti merokok seperti mQuit serta keberkesanannya. Berapakah pula jumlah peruntukan yang disalurkan untuk menjayakan program tersebut.

JAWAPAN

Tuan Yang di-Pertua,

1. Pihak KKM telah mengambil **tiga langkah utama** bagi meningkatkan jumlah penyertaan perokok yang ingin berhenti merokok ke dalam program berhenti merokok iaitu:

- i. **Meningkatkan kebolehcapaian perkhidmatan** berhenti merokok dengan memperluaskan perkhidmatan di klinik kesihatan dan hospital KKM yang menjalankan rawatan berhenti merokok serta menjalinkan kerjasama pintar bersama perkhidmatan swasta dalam menjalankan perkhidmatan berhenti merokok;
- ii. **Menjalankan aktiviti promosi** bagi menghebahkan perkhidmatan berhenti merokok melalui media cetak dan media sosial; dan

- iii. **Menyediakan laman sesawang khusus** iaitu portal **jomquit.com** melalui kerjasama pintar antara agensi swasta dan badan profesional bagi memudahkan interaksi serta pendaftaran ke perkhidmatan berhenti merokok mQuit.

2. Perkhidmatan rawatan berhenti merokok telah dilaksanakan di Malaysia sejak tahun 2000. Ia telah dimulakan di klinik kesihatan dan diperluaskan di hospital-hospital KKM. Perkhidmatan ini seterusnya diperkukuhkan bagi meningkatkan kebolehcapaian dengan jalinan kerjasama pintar bersama perkhidmatan swasta. Perkhidmatan Berhenti Merokok ini dinamakan perkhidmatan mQuit dan telah bermula sejak tahun 2015.

3. Perluasan perkhidmatan yang dilaksanakan ini bukan sahaja dapat menggalakkan penyertaan perokok ke perkhidmatan berhenti merokok malahan ia adalah selaras dengan Artikel 14, *World Health Organization Framework Convention on Tobacco Control (WHO FCTC)*.

4. Perkhidmatan Berhenti Merokok mQuit telah dirancang secara berfasa bermula fasa pertama iaitu daripada tahun 2015 sehingga 2017 dengan matlamat meningkatkan kebolehcapaian rakyat ke perkhidmatan berhenti merokok di swasta. Seterusnya, Perkhidmatan Berhenti Merokok mQuit ini dilanjutkan ke fasa kedua bermula tahun 2017 sehingga 2020 dengan tumpuan khusus bagi menggalakkan perokok di sektor pekerjaan mendapatkan rawatan berhenti merokok di fasiliti yang telah disediakan. Terkini, Perkhidmatan Berhenti Merokok mQuit akan memasuki fasa ketiga pada tahun 2021 sehingga 2025 dengan menggalakkan penyertaan perokok ke Perkhidmatan Berhenti Merokok mQuit melalui sistem rangkaian khusus atau *Uberization*.

5. Bagi menggalakkan penyertaan perokok ke Perkhidmatan Berhenti Merokok mQuit, informasi berkaitan pautan ke laman sesawang '**jomquit**' telah dilaksanakan melalui paparan khusus di papan tanda larangan merokok. Papan tanda larangan merokok ini telah dipamerkan di semua tempat-tempat larangan merokok. Sehingga kini, lebih 100,000 keping tanda larangan merokok baharu telah diedar dan dipamerkan di seluruh negara.

6. Selaras dengan situasi semasa pandemik COVID-19, informasi berkaitan merokok dan jangkitan COVID-19 dan cara penyertaan kepada Perkhidmatan Berhenti Merokok mQuit juga telah dimuatnaik melalui aplikasi MySejahtera.

7. Selain itu, bagi memudahkan akses ke pendaftaran Perkhidmatan Berhenti Merokok mQuit, satu laman sesawang khusus iaitu portal '**jomquit.com**' telah dibangunkan menerusi kerjasama pintar bersama-sama agensi swasta dan badan profesional. Capaian portal jomquit.com ini juga telah di masukkan di bawah aplikasi MySejahtera.

Tuan Yang di-Pertua,

8. Kesemua langkah-langkah yang telah dijalankan di atas telah menunjukkan keberkesanan seperti berikut:

- a. Jumlah perokok yang mendaftar bagi mendapatkan rawatan berhenti merokok telah meningkat daripada 10,240 orang pada tahun 2017 kepada 20,032 orang pada tahun 2018 dan seterusnya kepada 22,601 orang pada tahun 2019.
- b. Melalui promosi penggalakkan berhenti merokok semasa pandemik COVID-19, seramai lebih 3,442 orang telah mendaftar melalui laman sesawang Jomquit bermula 1 Januari 2020 sehingga 21 Oktober 2020 berbanding dengan keseluruhan tahun 2019 iaitu seramai 1,678 orang perokok.
- c. Daripada jumlah pendaftaran pada tahun 2020 (3,422), sebanyak 3,254 orang atau 95% telah mendaftar sepanjang tempoh pelaksanaan Perintah Kawalan Pergerakan (PKP) bermula 18 Mac 2020.

7. Kesemua langkah-langkah yang dinyatakan telah dilaksanakan oleh rakan kongsi strategik Perkhidmatan Berhenti Merokok mQuit tanpa sebarang implikasi kewangan kepada Kementerian Kesihatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN KHALID ABD SAMAD (SHAH ALAM)

TARIKH : 9 DISEMBER 2020 (RABU)

SOALAN

TUAN KHALID BIN ABD SAMAD [SHAH ALAM] minta **MENTERI DALAM NEGERI** menyatakan apakah status terkini siasatan kes pelanggaran SOP oleh Menteri Perusahaan, Perladangan dan Komoditi tempoh hari.

JAWAPAN

Tuan Yang Di Pertua,

Untuk makluman, pihak PDRM telah menerima sebanyak 27 laporan polis ke atas YB Menteri Perusahaan Perladangan dan Komoditi yang didakwa tidak menjalani kuarantin selepas balik dari luar negara. Siasatan telah dijalankan bersabit Sri Petaling Repot 5634/2020 bertarikh 19 Ogos 2020 di bawah Seksyen 22 (b) Akta Pencegahan dan Pengawalan Penyakit Berjangkit 1988 (Akta 342).

Kertas siasatan telah dikemukakan kepada Pejabat Peguam Negara yang mempunyai bidang kuasa mutlak untuk keputusan selanjutnya. Untuk makluman Ahli Yang Berhormat, YB Menteri berkenaan juga telah membayar sejumlah kompoun yang dikenakan ke atas beliau.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 9 DISEMBER 2020 (RABU)

SOALAN

PUAN MARIA CHIN BINTI ABDULLAH [PETALING JAYA] minta **MENTERI ALAM SEKITAR DAN AIR** menyatakan mengapa Pihak Berkuasa Tempatan dikecualikan dari pasukan Petugas Khas Cegah Jenayah Alam Sekitar sedangkan kebanyakan pencemaran berlaku di dalam, ataupun berpunca dari kawasan PBT.

JAWAPAN

Tuan Yang Di-Pertua,

1. Bagi menyelaraskan tindakan lebih berkesan ke atas penjenayah alam sekitar termasuk pencemaran sumber air, KASA telah menubuhkan Unit Cegah Jenayah Alam Sekitar (UCJAS) yang mula beroperasi secara pentadbiran pada 1 Oktober 2020. Justeru, di dalam usaha memperkasakan penguatkuasaan Akta Kualiti Alam Sekeliling 1974 dan membendung pencemaran alam sekitar, Unit Cegah Jenayah Alam Sekitar ditubuhkan dengan tujuan seperti berikut:

- (i) memantapkan penyiasatan sedia ada melalui pendekatan risikan dan kaedah forensik;
- (ii) menjadi pusat pengumpulan maklumat dan data bagi jenayah alam sekitar dalam membantu siasatan pencemaran;

- (iii) mencegah, membanteras dan membendung kejadian pencemaran alam sekitar; dan
- (iv) mempercepatkan tindak balas siasatan, dan mengambil tindakan undang-undang.

2. Pada masa ini, KASA mengguna pakai perjawatan dan peruntukan sedia ada dengan kerjasama Polis Diraja Malaysia (PDRM). Menurut anggaran KASA, sejumlah 50 pegawai tambahan adalah diperlukan yang akan ditempatkan di setiap negeri bagi mengagotai UCJAS ini. Secara keseluruhan, UCJAS akan melibatkan penempatan pegawai penguat kuasa daripada Jabatan Alam Sekitar (JAS), Suruhanjaya Perkhidmatan Air Negara (SPAN) dan Jabatan Biokeselamatan. Unit ini akan bekerjasama dengan PDRM daripada aspek kepakaran siasatan, risikan dan forensik.

3. Penubuhan Unit Cegah Jenayah Alam Sekitar ini adalah sebagai langkah tambahan bagi penguatkuasaan sedia ada, yang bertujuan mencegah, membanteras dan membendung kes-kes pencemaran alam sekitar. Sehingga kini, keanggotaan unit ini adalah terdiri daripada Jabatan dan agensi di peringkat persekutuan sahaja iaitu JAS, PDRM, SPAN dan Jabatan Biokeselamatan.

4. Walau bagaimanapun, pihak-pihak berkenaan seperti Pihak Berkuasa Tempatan, Lembaga Hasil Dalam Negeri, Jabatan Imigresen Malaysia, Tenaga Nasional Berhad dan sebagainya akan turut dilibatkan dalam operasi yang dilaksanakan sekiranya diperlukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SIVAKUMAR A/L VARATHARAJU
NAIDU (BATU GAJAH)**

TARIKH : 9 DISEMBER 2020 (RABU)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI DALAM NEGERI** menyatakan pendirian Kerajaan mengenai Akta Kesalahan Keselamatan (Langkah-langkah Khas) 2012 [SOSMA]. Adakah Kerajaan bercadang untuk memansuhkan atau meminda undang-undang yang zalim ini. Jika ya, bila.

JAWAPAN

Tuan Yang Di Pertua,

Kerajaan berpandangan bahawa Akta Kesalahan Keselamatan (Langkah-Langkah Khas) [Security Offences (Special Measures) Act, SOSMA] 2012 masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang sedemikian bagi membanteras dan membendung ancaman-ancaman keselamatan seperti pengganas dan juga sindiket jenayah terancang.

Walaupun begitu, Kementerian komited untuk menambahbaik undang-undang keselamatan tersebut dari semasa ke semasa bagi memastikan keamanan dan keselamatan Negara sentiasa terpelihara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS TAHUN 2020**

PERTANYAAN : LISAN
DARIPADA : YB DATO' SRI ABDUL AZEEZ BIN ABDUL RAHIM [BALING]
TARIKH : 9 DISEMBER 2020 (RABU)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI SUMBER MANUSIA** menyatakan apakah Kerajaan merancang untuk melaksanakan Skim Jaminan Pekerjaan (*Job Guarantee Scheme*) bagi mengurangkan kadar pengangguran yang telah mencecah hampir 750,000 orang pada Julai 2020.

JAWAPAN

Tuan Yang di-Pertua,

1. Skim Jaminan Pekerjaan (*Job Guarantee Scheme*) merupakan satu cadangan pendekatan yang boleh dipertimbangkan oleh Kerajaan dalam menangani isu pengangguran dan memastikan golongan pekerja kekal dalam pekerjaan serta terus mempunyai sumber pendapatan. Walau bagaimanapun, pelaksanaan skim seumpama ini dijangka akan melibatkan peruntukan kewangan yang terlalu tinggi dan meletakkan tekanan kepada kedudukan kewangan negara dalam situasi Covid-19 yang masih berterusan pada masa ini.
2. Sehubungan itu, Kerajaan pada ketika ini sedang memberi fokus terhadap beberapa inisiatif dan program yang lebih berfokus dan menjurus kepada peningkatan kebolehkeraan (*employability*) dan penempatan pekerjaan kepada rakyat melalui Pelan Jana Semula Ekonomi Negara

(PENJANA). Inisiatif ini bertujuan untuk membantu mereka yang kehilangan sumber pendapatan untuk mendapatkan pekerjaan, melindungi pekerjaan dan meningkatkan kemahiran.

3. Lima (5) inisiatif PENJANA di bawah Kementerian Sumber Manusia adalah Pelaksanaan Program Subsidi Upah, Menaik Taraf Portal Perkhidmatan Pekerjaan Negara, Program Insentif Pengambilan Pekerja dan Bantuan Latihan, Program Kemahiran dan Peningkatan Kemahiran dan Perlindungan Sosial dan Latihan bagi Pekerja Ekonomi Gig.

Untuk makluman Ahli Yang Berhormat,

4. Program Subsidi Upah (PSU 1.0) dan pelanjutan Program Subsidi Upah (PSU) 2.0 membantu majikan yang terkesan supaya dapat meneruskan operasi syarikat serta mengelakkan pekerja hilang pekerjaan. Program ini melibatkan pengagihan dana Kerajaan berjumlah RM2.4 billion dengan sasaran seramai 1.3 juta pekerja. Melalui PSU 1.0, sejumlah 331,950 syarikat dan 2.73 juta pekerja telah menerima manfaat ini. Sehingga 27 November 2020, PERKESO telah menyalurkan bantuan kepada 77,882 majikan dan 782, 904 pekerja melalui program PSU 2.0.

5. Kerajaan telah memperuntukkan sejumlah RM1.5 billion kepada PERKESO untuk Program Insentif Pengambilan Pekerja dan Bantuan Latihan. Program ini merangkumi insentif pengambilan pekerja, peningkatan kemahiran pekerja dan penganggur, bantuan perpindahan, dan kerjasama dengan agensi pekerjaan swasta sehingga tempoh 6 bulan. Program ini telah berjaya membantu seramai 90,930 ribu pekerja sehingga 27 November 2020.

6. Kementerian juga melalui Pembangunan Sumber Manusia Berhad (PSMB), telah melancarkan Inisiatif PENJANA HRDF pada 22 Jun 2020. Lima (5) skim telah diperkenalkan yang memberi penekanan terhadap latihan dan peningkatan kemahiran pekerja (*upskilling* dan *reskilling*) iaitu *Place and Train*, *B40 Development*, *SME Development*, *Industry Revolution 4.0* dan Gerak Insan Gemilang (GIG).

7. Dalam usaha kerajaan untuk memperkasakan rakyat, Kementerian juga telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak RM2 billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah 200,000 orang penerima latihan.

8. Dalam usaha kerajaan untuk memperkasakan rakyat, Kementerian juga telah dipertanggungjawabkan untuk turut menyelaraskan pelaksanaan program PENJANA *Upskilling & Reskilling* dengan jumlah peruntukan sebanyak RM2 billion. Program kemahiran dan peningkatan kemahiran ini sedang dilaksanakan merentasi Lapan (8) Kementerian dan Agensi dan akan memanfaatkan sejumlah 200,000 orang penerima latihan.

9. PENJANA *Upskilling & Reskilling* akan membantu golongan penganggur dalam mendapatkan pekerjaan baharu (*new jobs*), menghasilkan usahawan baharu (*new entrepreneurs*) atau pengekalan pekerjaan (*job retention*). Sehingga kini, sejumlah RM500 juta peruntukan telah disalurkan dan seramai 102,000 pelatih telah diluluskan untuk mengikuti pelbagai program dibawah PENJANA *Upskilling & Reskilling*. Langkah ini dijangka akan terus membantu mengurangkan kadar pengangguran Negara ke aras yang lebih stabil.

10. Kementerian juga telah mengambil langkah pro aktif bersama-sama Kementerian Kewangan untuk memantau dan menyelaraskan pelaksanaan inisiatif-inisiatif berkaitan sumber manusia tersebut dengan menubuhkan Jawatankuasa Pekerjaan Nasional (JKPN) pada Jun 2020. Objektif Jawatankuasa ini adalah untuk memantau keadaan pasaran buruh dan pengangguran negara, menyelaraskan pelaksanaan inisiatif PENJANA serta dan memantau keberkesanan inisiatif-inisiatif tersebut.

11. Jabatan Perangkaan Malaysia (DOSM) menganggarkan julat maksimum kadar pengangguran adalah dalam lingkungan 3.5 peratus hingga 5.5 peratus pada tahun ini susulan daripada pandemik Covid-19. Berdasarkan Survei Tenaga Buruh (STB) oleh DOSM, pengangguran

mencatatkan kadar tertinggi pada Mei 2020 iaitu sebanyak 5.3 peratus (826.1 ribu orang).

12. Kerajaan yakin bahawa pelaksanaan insentif-insentif berfokus seperti yang saya sebutkan tadi telah menyumbang kepada pemulihan pasaran buruh Malaysia yang dapat diperhatikan dengan kadar pengangguran menurun kepada 4.9 peratus (773.2 ribu orang) pada Jun 2020 dan seterusnya kepada 4.7 peratus (745.1 ribu orang) pada Julai 2020 manakala kekal pada 4.7 peratus bagi Ogos 2020. Data terkini STB pada September 2020 menunjukkan kadar pengangguran turun kepada 4.7 peratus dengan bilangan penganggur seramai 737.5 ribu orang.

13. Sebuah kerajaan yang baik mestilah sentiasa prihatin kepada rakyat termasuklah ketika berdepan dengan wabak COVID-19 dengan menyediakan pelbagai bentuk bantuan untuk dimanfaatkan. Kerajaan sentiasa mengalu-alukan cadangan Yang Berhormat sekalian dalam membantu meringankan beban rakyat pada masa ini.

Sekian, Terima Kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS (2020)**

PERTANYAAN : LISAN

DARIPADA : TUAN CHAN FOONG HIN [KOTA KINABALU]

TARIKH : 9 DISEMBER 2020 (RABU)

SOALAN

TUAN CHAN FOONG HIN[KOTA KINABALU minta **MENTERI ALAM SEKITAR DAN AIR** menyatakan status terkini projek tebatan banjir berjumlah RM3 bilion untuk Kota Kinabalu, Penampang, Putatan dan Sepanggar sejak RMK-7 lagi, namun hanya RM512 juta diluluskan sehingga RMK-11. Apakah tindakan jangka pendek untuk mengurangkan banjir kilat di Sabah.

JAWAPAN

Tuan Yang Di-Pertua,

1. Dalam RMKe-10, Kerajaan telah meluluskan peruntukan sebanyak RM56.6 juta bagi pelaksanaan lima (5) projek Rancangan Tebatan Banjir (RTB) di Negeri Sabah. Kesemua projek RTB tersebut telah siap sepenuhnya dan kini dalam proses Perakuan Akuan Muktamad. Kerajaan telah meluluskan peruntukan sebanyak RM746 juta dalam RMKe-11 bagi pelaksanaan projek-projek Rancangan Tebatan Banjir (RTB) di Negeri Sabah yang dilaksanakan oleh JPS sebagai agensi pelaksana. Sebanyak 8 projek di dalam peringkat pelaksanaan di tapak manakala 7 projek di dalam peringkat awalan projek merangkumi kawasan Kota Kinabalu, Penampang, Putatan dan Sepanggar.

2. Selain itu, Kementerian melalui JPS juga telah memohon peruntukan bagi Projek Rancangan Tebatan Banjir (RTB) di Negeri Sabah

dalam RMKe-12. Projek-projek tebatan banjir yang dirancang ini akan mampu mengurangkan isu banjir yang diakibatkan oleh limpahan sungai-sungai utama di kawasan-kawasan yang berkenaan.

3. Bagi tindakan jangka masa panjang, Kementerian melalui JPS akan mempertimbangkan pelaksanaan Kajian Pelan Induk Saliran Mesra Alam sebagai rujukan dalam merancang infrastruktur saliran di kawasan tersebut dan penglibatan Pihak Berkuasa Tempatan (PBT) juga adalah amat penting terutamanya di dalam mengatasi masalah banjir kilat di Negeri Sabah.

Sekian. Terima kasih.